

ETEHUE'YO JESOSAJA EPEEJJI CUANA EMEOJA ESOHUIJO MIMIANI YASIJJE HEBREOS

Eyacuiñajjiya oja Bacua Ejja huoojea canaje ona oja esohui ba meeya

¹ Ecuea epeeji cuana quea huiso meshijo ba'e, yahuaajo nei nei Eyacuiñajjiya ojaya epeeji nei cuana huoojea ca poa esejaya etiiquiiana que, Jodio etiiquiiana que. Jama poa ba'a: “¡Huohuiquicue Jodio cuana huasijje ecuea ejjashahuabaquijji oj-jañaja ebajji! ¡Huohui majamajacue oe!” Ma huoojea nequime aca poa; pea mano'yajo huoojea'yo esohui huohuijji aca nequia poa. Oe esohui huohuijji quea huiso huohui meesahua ca poa Eyacuiñajjiya ojaya ejjashahuabaquijji. Pea esohui huohuijji pea esohui huohui meesahua ca poa ojaya ejjashahuabaquijji pea'ai. Jamatii huohuijjima poa ojjaña Eyacuiñajjiya ejjashahuabaquijji.

² Jjeya ca ca Eyacuiñajjiya oja Bacua Ejja Jesosa Quito bajjani huoojea canaje eseya ojjaña ojaya ejjashahuabaquijji ba meeya. Ohuaya Jesosaa oja Chii nijjeya ojjaña pana ca'ya poa, ojjaña aquiiana meshijo e'anijji, eyatahuatahuajo enequijji pea'ai pana ca'ya poa. Jamajjeya ojaya nei aquiiana. Jesosa ojjaña huoojea'yojji poani tii tii eyajo, meshi cuanaajo pea'ai.

³ Jesosa oja Chii jayojjaya poa. Quea pame nee nee, quea ca'a nee nee. Jesosa oja Chii jayojjaya

poani tii tii. Oya quea sohui poja nee neeya jjejojo ojjaña nequi mee ca poa. Ma ecua ohuaya yahuajo huohui ca poa jamaya acani ohuaya jjeya ojjaña eyajo nequi, ojjaña meshijo nequi pea'ai nequi ca'a tiitii mee cani Jesusaa. Oya ojjañaja mimishi cuijea'yo majje, ma ojjaña ojaya epeeji epojjija mimishi cuijea'yo majje anioquenaje oja Chii pejejo ebianeijje. Jomajo oya, Jesosa ojjaña huoojea'yojji poani tii tii. E'e, Eyacuiñajji, Jesosa pea'ai quea ca'a nee nee po tiitiiani. Pea ca'a'ama.

Jesosa Eyacuiñajjija Bacua Ejja quea ja'a nee nee esohuidojojji cuana quea ja'a pishana

⁴ Eyacuiñajjiya Jesosa nequi mee cani quea ja'a nee nee. Ojaya esohuidojojji cuana ca ca nequi mee cani quea ja'a pishana. Esohuidojojji cuana bajjani canaje quea bajjani pame pishana, Eyacuiñajjija echacoji bajjani. Jesosa ca ca Eyacuiñajjija Ebacua Ejja quea pame nee nee.

⁵ “Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii”. Jamaya Eyacuiñajjiya Jesosa acanaje. Eyacuiñajjija ca ca esohuidojojji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: “¡Eya e'e jojo nee mique Chii caba cahua cuaa! E'e, miya ecue Bacua Ejja oe nei”. Jama Jesosa huohuimeya acanaje. Jama huohuimeya esohuidojojji ajjima Eyacuiñajjija.

⁶ Eyacuiñajjiya oja Bacua Ejja oe nei meshi yasiije huoojea jeahua esohuidojojji jama huohuime aca poa ba'a: “¡Esohuidojojji cuana, ecue Bacua Ejja oe bihuiacue, ojjaña!” Jamaya Eyacuiñajjiya aca poa Jesusajo.

⁷ Eshuidojojji jama aca poa ba'a:

“Eyaya ecue eshuidojojji huoojeaña quea cuejipashi nee nee pojjeje jama, quea quemo nee nee beni jama”.

Jamaya Eyacuiñajji poa.

⁸ Oja bacua ca ca Eyacuiñajjiya huohui ca poa jama ba'a:

“Miya ca ca oe ecue Bacua Ejja e'e jojo nei, e jayojjaya tii tiiya Eyacuiñajjiya ca mi coma. Miya ojjaña huooejaji poani tii tii ojjaña meshi yasijje. Quea ja'a nee nee ojjaña huoojeaña tii tii.

⁹ Ojjaña quea ja'a nee nee poani; ecuea ejjashahuabaquijji jayojja jama poani miquea quea boti nee nee poani. Mimishi cuana ca ca cajaaña. Jamajjeya eyaya miya babaca'ya poa ojjañaja Emeshi Mese nei epojji. Ojjaña miya shajja'ajja caje ojjaña meshijo ba'eca cuaa. Pea emeshi mese shajja'ajja jjima acaje cuaa. Jamajjeya miya quea jaji nee nee poani tii”.

Jamaya yahuajo nei Eyacuiñajjiya tehue mee ca poa Jesosa nijje.

¹⁰ Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

“Emeshi Mese nei, miyaya ebionei meshi pana cooa poa ojjaña. Eyatahuatahua pana cooa poa quea huesha nee nee, ojjaña eyajo enequijji pea'ai.

¹¹ Ojjaña miquea epana'yo oe poaje, meshi cuana, eyatahuatahua pea'ai. Miya ca ca nequi tiitije'yo. E'e, miya ca ca oe nequi tiitije'yo. Meshi etii poaje, eyatahuatahua pea'ai. Jiquio ecua daqui eyacua daqui chii poani, daqui chii chii'yajo iñajjajja'yo

majje jeajeaña jayojja jama eyaya meshi aje, eyatahuatahua pea'ai.

¹² E'e, daqui chii jeajeaña eyacua ehuoshojji jayojja jama meshi, eyatahuatahua pea'ai tiil'yajo eyaya cajaa aje eyacua epana'yojji. Miya ca ca jamatii nequi tiitiije'yo quea ja'a nee nee”.

Jamaya poanaje Eyacuiñajji oja Bacua Ejja nijje, Jesosa nijje.

¹³ E'e, jamaya Eyacuiñajjiya oja Bacua huohui ca poa esejaya ebajji jama ba'a:

“¡Anioquecue ecuea ebianeí mijijje enijje ojjaña huoojea'yojji! ¡Epejjejo ishoa'ajjacue! Mi quecuajji nisho yani. Eyaya oya cuana ca'a'ama po mee majje mi shajja'ajajji po meeje'yo”.

Jamaya Eyacuiñajjiya oja Bacua Ejja ca ca oe huohui ca poa. Esohuidojojji nijje ca ca jama mimimeya po jjima.

¹⁴ E'e, esohuidojojji cuana Eyacuiñajjiya huoojea'yo ca ca oe. Oya cuana huoojea cani Jesosaja epeeji cuana jaahuanaa, ma onijje eyajo eba'e tiitii'yojji cuana jaahuanajji.

2

¡Jesosa shajja'ajjacue ojaya epeeji nei epojji!

¹ Ecuea epeeji cuana, jamajjeya ¡shajja'ajja neineicue Jesosaja esohui ojaya epeeji nei nei epojji! Yahujajo pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya doojea cani jayojja jama poaje; poquiquehua chana se esohui pajea'yo majje.

² Yahuaajo nei nei Eyacuiñajjiya esohuidojojji esejaya etiiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea esohuidojojjiya esohui e'e nei!” jamaya Eyacuiñajjiya etiiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajjajojo quea nee nee po mee ca'ya poa.

³ Jjeya ca ca Eyacuiñajjiya eseya quea pame nee nee acani. Jesosa nijje jjapeequianijo, ohuaya eseya ba'e tiitii mee caje'yo eyajo. Jesosa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesosaa esejaya Emeshi Mese neiya huohui coo ca poa jama ba'a: —Enijje jjapeequiajo, eyaya miquianaya ba'e tiitii meeje'yo enijje —Jesosa poanaje.

Majoya o shajja'ajjajji cuaa eseya huohui canaje jama ba'a: —E'e jojo nei Jesosaa eseya ba'e tiitii mee caje'yo eyajo onijje jjapeequianijo.

⁴ Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesosaja epeeji cuana ma dejjaa ajjima acani ameesahua canaje. Ma dejjaja yahuaajo ba jjima poa ba meesahua canaje pea'ai. Edojjoshahua Pame huoojea canaje pea'ai ojaya ejjashahuabaquiiji jayojja jama ameesahuaa, Eyacuiñajjiya. Jamajjeya eseya ba mee canaje e'e jojo nei Jesosaa eseya ba'e tiitii mee caje'yo eyajo onijje jjapeequianijo.

Meshi eyacuajo ojjaña huoojea'yojji poaje Jesosa

⁵ E'e, quiije Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuiaña jama poaje ba'a: Eyacuiñajji Jesosaja

epeeji cuana nijje jama poanaje ba'a: —E'e jojo nei meshi eyacuajo miqúanaya ona huoojeajji poaje —Eyacuiñajji jamaya poanaje Jesusaja epeeji cuana nijje. Jamaya mimi jjima esohuidojojji nijje, de.

⁶ Chojja. Yahuajo nei nei Dabi tehue meesahua ca poa Eyacuiñajjiya jama ba'a:

“Eyacuiñajji, miya jjashahuaba tiitiquiani meshijo eba'eji cuanajo. Deja cuana ca'a'ama. Quea pame pishana. Jamatii oya cuana miyaya jaahuanaña.

⁷ E'e Eyacuiñajji, yahuajo miyaya ojjaña deja cuana quea pame anaje; esohuidojojji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee nee po meenaje.

⁸ Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Deja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiana cuana huoojeajji. Jamatii eseyaya baña jjeya deja cuana ojjaña huoojeajji po jjima poani.

⁹ Jesosa ca ca esejaya eba. Eyacuiñajjiya oya nequi mee ca poa beshahua nei esohuidojojji quea pame jayojja. Jamaya nequi mee ca poa oe pojji daqui sheme. Eseyaya Eyacuiñajjiya quea jea nee poanijo, Jesosa ese jayojja yamijji poa; emano'yojjiya poa. Jamajjeya Jesosa ojjaña nahueji mano'yonaje. Eyacuiñajjiya oya shequi mee ca o'oyanaje quea bame nee nee enequi tiiti'yojji. Pea chama' o jayojja, de.

10 Eyacuiñajjiya oja Bacua Ejja nijjeya, Jesosa nijjeya ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñajji quea bihui po meeji. Oya ojjañaja Emeshi Mese tii poani; ojjaña Jesusaja epeeji nequi tiitii mee sa poani onijje: — E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñajji jjashahuabaquinaje—. Jamajjeya jamaya poaje. Ecuea Ebacua Ejja quea nee nee po meeje. Jamaya quea pame. Jamajjeya ohuaya, Jesusaa quea huiso ba'e tiitii mee caje'yo onijje eyajo —jamaya Eyacuiñajji poanaje.

11 Jamajjeya Jesusaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jay-ojja pea'aiya. Jamajjeya oya, Jesosa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesusa poani.

12 E'e, Eyacuiñajjiya esohui yahuajo nei etehue'yojo Jesosa oja Chii nijje jama poa ba'a: “Eyacuiñajji, eya ecuea huapa pojjeama cuana nijje mimije mijo. Eyaya miya bihuiaje ojjaña ecuea epeeji cuanaja eshajja'ajajji jama ba'a: —Eyacuiñajji, miya ca ca oe quea ca'a nee nee nequi —jamajjeya eya sohuicuayaje”.

13 Jamaya pea esohui yahuajo nei etehue'yojo Jesusaa aca poa ba'a: “Eyacuiñajji, eya ca ca iña miyaya baña Eyacuiñajji nei nei. Miyaya eya jaahuanaña e'e jojo

nei”.

Jama pea'ai poa ba'a:

“Eyacuiñajji, jeya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesusaja esohui.

¹⁴ Jesusaja epeeji cuana dejja cuana aje oe yamijji. Jamajjeya oya, Jesosa poeyanaje yamijji, ese jayojjaya mano'yome epojji. Mano'yonajeya jjejojo ohuaya Edosiquiana nei Satanasa bajjani jeabichajea ca'yonaje, ma ojjaña manomee'yojji poani jeabichajea ca'yonaje. E'e, eba'e tiitii'yojji jjejojo mete'ama eseya poaje emano'yojji.

¹⁵ Yahuajo ojjaña eseya quea mete jjashahuabaqui aninaje jama ba'a: —E'e de, eya manojeyo. Jamaya quea tai. Quea mete ca ñña emano'yojji —eseya poanaje.

Jesusaja epeeji nei ca ca jjashahuabaquiani jama ba'a: —E'e, eya manojeyo. Jamatii Eyacuiñajjiya eya ba'e tiitii mee caje'yo onijje eyajo.

¹⁶ Jamajjeya Jesosa dejja jayojja yamijji poeyanaje. Poeyanaje esohuidojojji jayojja pojjeama, esohuidojojji jaahuanaa pojjeama. Chojja. Jesosa poeyanaje dejja jayojja yamijji ese jaahuanaa, Amajamaja osecua cuana jaahuanaa.

¹⁷ Jamajjeya oya, Jesosa ese jayojjaya poanaje ojjaña ojaya epeeji nei jaahuanajji jama ba'a: Eyacuiñajji nijje emimijji etii yahuajo ba'eya Eyacuiñajjiya esohui jayojja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesusaa Eyacuiñajjiya ejjashahuabaquiji jama e'e jojo nei acani quea ja'a nee. Eseja

mimishi cuijea'yojji mano'yonaje. Jamaya Eyacuiñajji ese nijje e'e jojo nei quea bei po mee canaje tii tii.

¹⁸ Jiquio meshijo ba'e Jesosa quea nee nee poa. Cuanaya Edosiquiana neiya, Satanasa Jesosa quea mimishi epo meeji nisho aca poa. Jamajjeya Satanasa eseya quea mimishi po mee sa acanijo, Jesosaa eseya quea pame ba'e mee cani. Jamaya Jesosaa ameesahua cani ba'a: —Chojja, eya Jesosaja epeeji poani. Ohuaya eya jaahuana canijo, quea mimishi po maja sa po ajja ca iña —jamaya Jesosaa eseya po meesahua cani.

3

Jesosa quea pame nee; Moisesi quea pame pishana poa

¹ Jamajjeya ecuea epeeji cuana, ¡Jesosajo oe jjashahuabaquicue! Eyacuiñajjiya eseya babaca canaje Jesosaja epeeji epojji, onijje eyajo eba'e tiitii'yojji. E'e, ¡Jesosajo oe jjashahuaba tiitiquicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeeji cuanaajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

² E'e, Eyacuiñajjiya yahuajo Jesosa babaca ca poa ojaya epeeji cuana jaahuanajji epojji. Ojaya epeeji cuanaajo onijje emimijji quea pame nee nee po mee ca poa. Ma ecua Eyacuiñajjiya huohui canaje jamaya e'e jojo nei acanaje Jesosaa. Jesosaa jayojjaya etiiquiana Moisesiya Eyacuiñajjiya epeeji cuana jaahuaname aca poa yahuajo nei nei.

³ Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjija epeeji quea ja'a nee epo meeji. ¡Quea pame nee nee Jesosa! Moisesi ca ca echacosahuajji jayojja jama poa; Jodio cuana beshahua nei Eyacuiñajji nijje jjapeequi meesahua ca poa.

⁴ E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayojjaya Jesosaa ojaya epeeji cuana yahuaajo nei nei ba'ya poa quea ja'a nee onijje jjapeequi meesahua ca poa; ojaya epeeji jjeya nei ba'yani pea'ai jjapeequi meesahua cani onijje.

⁵ Jamajjeya Moisesi Eyacuiñajjija echacoji poa. Jiquio ecua echacojiya equijo chaco neinei cani jama jayojja Moisesiya Eyacuiñajjija esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pea'ai.

⁶ Jesosa Quito ca ca Eyacuiñajjija Ebacua Ejja. Oya e'equi mese jayojjaya, equi chacoji jayojja pojjeama. Eseyo ojaya equi jayojja poani. E'e, eseya Eyacuiñajjija equi jayojja poani ca jama jjashahuabaquianijo tii ba'a: —Eya Eyacuiñajjija epeeji. Ohuaya eya ba'e tiitii mee caje'yo onijje eyajo.

Jamajjeya ¡jamaya huohui tiitiicue! ¡Jesosa nijje quea bihui nee jjapee tiitiicue! Ohuaya eseya jaahuana cani quea ja'a nee nee.

Ojaya epeeji cuana jomishoca mee caje'yo Je-sosaa

⁷ Yahuajo nei nei Edojjoshahua Pameya esejaya etiiquiiana esohui tehue mee ca poa jama ba'a:

“Jjeya nei Eyacuiñajji minijje mimianijo, ¡ojaya esohui shajja'ajja neineicue!

⁸ ¡A'a shajjama'pojji! ¡Miquianajaya etiiquiiana jayojja jja oe a'a pojji! Yahuajo nei Eyacuiñajji esohui shajja'ajja jjima poa meshi jabojo nequiija. Meshi quimajo nequi etiiquiiana cuana quea mimishi nee nee poa. Jamatii Eyacuiñajji quenequene cuaji ajja poa etiiquiiana nijje.

⁹ E'e, miquianajaya etiiquiaa yahuajo nei ba'ya poaa Eyacuiñajji ba'ajja ca poa. Jama poa ba'a: —Eya quea mimishi poanijo jamatii Eyacuiñajjiya eya etecueajji pojjeama —jama posoya jjabaquia poa cuana. Jamajjeya Eyacuiñajjiya jama aca poa ba'a: —Miquianaya ca jja ca oe quea mimishi nee nee. Quea huiso shequijame, 40 shequijame eya miquianajo ishoa'ajjaña poa miquianajaya mimishi cuana epajea'yojji nisho.

¹⁰ Jamajjeya mimishi pajea'yo ajjajo eya quea tecue miquiana nijje poa: Miquianajaya ejjashahuabaquijji quea quehua, quea tai. Ecuea esohui jayojja jama a sa po'yo ajja. Jjabahuejjaqui'yo ajja —jamaya Eyacuiñajji poa—.

¹¹ Jamajjeya quea quene po majje eyaya miquianaya tecueajeana je jama ba'a: Shajjama' poanijo e'e jojo nei miquianaya ca mi ca oe edobiquijji pojjeama ecue meshi quea pame yasijje ejomishocajji, quea bei eba'e'yojji pea'ai”. Jamaya Eyacuiñajjiya etiiquiiana cuana Moisesi nijje nequi tecueajea ca poa. Jamaya yahuajo nei

esohui etehue'yo poa.

¹² Ecuea epeeji cuana, jamajjeya oe ¡quea ja'a nee jjashahuabaquicue! ¡Eyacuiñajji sohui jama acue! ¡A'a quea quehua jjashahuabaquijji! Shajjama' po majje Eyacuiñajji nijje miya jjapee pajequi chana'. Tecuea ca chana' mi. Oya ca ca oe ba'e tiitiani, de.

¹³ Jesosaja pea epeeji cuana nijje ca ca mimi huicha'a huicha'acue jama ba'a: —¡Jjeya nei Jesosa nijje ejjapee neineiqui!

Jamaya poanijo miquianaya mimishi cuanaja edasiajji pojjeama; quea mimishi nee nee epojji pojjeama.

¹⁴ E'e, Jesosa nijje jjapeequi jeahuajo eseya jjashahuaba neineiquinaje onijje eyajo eba'e tiiti'yojji. ¡Jamaya ejjashahuabaqui poqui! Jamajjeya quijje eseya onijje ona huoojea'yojji poaje'yo tii tii eyajo.

¹⁵ E'e, jamaya yahuajo nei esohui etehue'yo poa ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji! ¡Miquianajaya etiiquiana jayojja jama a'a pojji!”

Jamaya yahuajo Dabiya tehue ca poa.

¹⁶ ¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa.

¹⁷ Ona nijje Eyacuiñajji quea quene nee poa quea shequiaja huiso nee neejo, 40 shequiajame.

Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo.

¹⁸ Shajjama' tiitii poajoyo Eyacuiñajjiya oya cuana tecuea ca poa jama ba'a: "E'e jojo nei miqúanaya ecue meshi yasijje edobiquijji pojjeama quea bei nee ejomishocajji. ¡Quea mimishi nee nee mi coma!" Jamaya Eyacuiñajjiya etiíquiana yahuajo nei nei ba'ya poa tecuea ca poa.

¹⁹ Jamajjeya e'e jojo nei oya cuana meshi quea pame nee yasijje dobiqúi jjima poa ejomishocajji Eyacuiñajjiya esohui shajja'ajja sa po ajja jjejojo, ojaya epeeji nei pojjeama jjejojya.

4

Etiíquiana jayojja jama eseya ejomishocajji yasijje dobiqúi ajja po chana'

¹ Jamajjeya Eyacuiñajjiya yahuajo nei etiíquiana huohui ca poa jayojja jama ohuaya jjeya eseya huohui cani jama ba'a: —¡E que poe'yocue ejomishocajji, quea jjashahuabaqui bei nee nee epo'yojji! —oya poani.

Jamajjeya ¡quea ja'a jjashahuabaquicue! ¡Pea cuana quea ja'a jjashahuabaqui meesahuacue! ¡Ojee Jesúsaja epeeji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña.

² E'e, yahuajo nei Eyacuiñajjiya esejaya etiíquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña pea'ai, etiíquíaa jayojjaya. Etiíquíaa cuaa jiquio esohui shajja'ajja nisho ca

poa. Shajjama' poaa jjejojo eshajja'ajjajeajji shajja'ajjajea ca'ya poa. Jamajjeya Eyacuiñajjiya oya cuana jomishoca mee jjima aca poa, etiiquiana cuana.

³ Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama añajo, oniije jomishoca mee caje'yo, eseya. E'e, etiiquiana aje jja oe shajjama' poajojo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajeana je jama ba'a: –Shajjama' poanijo e'e jojo nei miqianaya edobiquiiji pojjeama ecue meshi quea pame yasijje quea jaji nee ejomishocajji”.

Jamaya Eyacuiñajjiya aca poa. Yahuajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiiquiana shajjama' cuana tecuea ca poa jama ba'a:

“Oya cuana aje oe edobiquiiji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

⁴ E'e jojo nei pea esohui yahuajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oeje oe, 6 cahuime. Majoya ojjaña apoa amajje oya jomisho ca poa cahui oe”.

⁵ E'e, etiiquianajo aje oe jama tehueme ya pea'ai poa ba'a: “Oya cuana aje oe dobiqiu jjiima poaje enijje jomishocaa”.

⁶ Jamajjeya etiiquiana cuana yahuajo nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejojo dobiqúi jjima poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji que dobiqúije jomishocaa.

⁷ Jamajjeya etiiquiana cuana Moisesi nijje nequi jjashajja'ajjaquí ajjajojo jomishoca mee jjima aca poa. Jamajjeya Eyacuiñajjiya quijje nei Dabi tehue mee ca poa jama ba'a etiiquianaja osecua cuana huasijje: “¡Jjeya nei jjashajja'ajjaquícue!” Jamaya Eyacuiñajji poanaje esejaya etiiquiana nijje, ma Dabi nijje nequi nijje. Jamajjeya eyaya Dabija etehue'yo huohuíje o'oya jama ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji!”

Jamaya yahuajo nei Dabiya tehue ca poa etiiquianaja onijje ba'eja ebajji.

⁸ E'e, Eyacuiñajjiya Josoe etiiquiana cuana ojaya meshi quea pame yasijje poquí meesahua ca poa. Jamatii jomishoca jjima poa; quea jjashahuabaquí ja'a po jjima. Jamajjeya esejaya eba Eyacuiñajji jjashahuabaquíani jama ba'a: —Quijje eyaya ojjaña ecuea epeejji nei cuana jomishoca meeje'yo —Eyacuiñajji poani.

⁹ E'e, quijje Eyacuiñajjiya ojjaña ojaya epeejji cuana jomishoca tiitii mee caje'yo onijje. Yahuajo nei ohuaya me oejje oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeejji nei cuana jomishoca mee caje'yo.

¹⁰ Jamajjeya Eyacuiñajjiya me oeje oe cahuime chaco majje chaco pajea ca poa; o jomishoca poa jayojjaya eseya Jesosa nijje jjapeequi majje quea bei jjashahuabaquiiani. Quijje chaco chaco pajeaje'yo, jomishoca tiitiije'yo onijje eyajo.

¹¹ Jamajjeya ijashajja'ajjaquicue oe! ¡Quea ja'a nei jjashahuabaquicue Jesusaja epeeji nei epojji, e'e jojo nei onijje ejomishoca tiiti'yojji! ¡A'a oe esejaya etiiquiiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

¹² E'e, Jesosa nijje jjapeequianijo oya ese nijje mimiani, o jayojja ameesahua cani. Ojaya esohui jayojja jama ohuaya eseya e'e jojo nei ameesahua caje'yo. E'e, ojaya esohui baa se beca jama. Jiquio ecua baaa shejjishejjiya jehuija'ajea majje esa' ba cani jama jayojjaya Eyacuiñajjiya esejaya ejjashahuabaqui'yojji cuana ba cani. E'e, Eyacuiñajjiya esohui ba neinei majje eseya jjashahuabaquiije esejaya eba'ejjijo quea ja'a pojja'a, quea mimishi pojja'a poani.

¹³ E'e jojo nei ojjaña Eyacuiñajjiya eba oja pana'yo. Chama' Eyacuiñajjiyo ejjanequi quehuaquijji, de. Jamajjeya quijje nei o cojja nei nequi majje eseyaya huohuije'yo quio eseya eshe nequiya anequinaje cuana.

Jesosa esejo Eyacuiñajji nijje mimianijo ¡quea ja'a nee jjapeequicue!

¹⁴ Jamajjeya ¡Jesosa nijje jjapeequicue! Jesosa ca ca oe nei Eyacuiñajji nijje mimi neineiiani; oya Eyacuiñajji nijje emimijji etii quea pame nee nee. Oya Eyacuiñajjiya Ebacua Ejja oe nei. Eyahuasijje

poqui'yonaje. Oja Chii pejeje nequi, Eyacuiñajji pejeje. Onijje mimiani esejo. Jamajjeya ¡Jesosa nijje e'e nei jjapeequicue!

¹⁵ E'e, Jesosa Eyacuiñajji nijje mimi neineiiani esejo. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseya Jesosa nijje jamaya mimiajo, ohuaya eseya saja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesosaa eseya acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseya quea mimishi poajo, ohuaya, Jesosaa eseya jaahuana cani tecue'amaa jjejojo.

¹⁶ Jamajjeya ¡Jesosa nijje bicho'ama emimi! Ohuaya esejaya mimishi cuana cuijea caje'yo. Eseya ojaya quea jea nee poanijo quea pame nee jaahuana caje'yo tii tii. Ca'a'ama poajo quea ca'a po mee caje'yo pea'ai.

5

¹ ¡Bacue! Eyacuiñajjija esohui jama jayojja esejaya etiiquianaa beca dejja onijje nequi babaca ca poa Eyacuiñajji nijje emimijji etii epojji. Babaca majje huoojea ca poa jama ba'a: —¡Eyacuiñajji nijje mimicue esejo! ¡Aquiana cuana, ijjiacajji cuana ehune' nequi pea'ai dahuacue ecuanaja yajji, Eyacuiñajji ecuanaja mimishijo quea bei epo meeji! —jamaya aca poa etiiquianaa.

² Ojjaña esejaya etiiquiana ca'a'ama, Eyacuiñajjija esohui ba neinei po jjima cuana, quea mimishi poa. Ma Eyacuiñajji nijje emimijji etii ca'a'ama pea'aijo oya pea cuana nijje tecue'ama poa. Quea bei mimianinaje Eyacuiñajji nijje pea cuanajo.

³ Jamatii oya ca'a'ama jjejojo quea mimishi poani pea'ai. Jamajjeya ijjiacajji ehuone' jaja majje onaja mimishijo dahuajea jeahuajo Eyacuiñajji nijje mimia poa jama ba'a: —Eyacuiñajji, jecuea mimishi cuijea'yocue! —acandinaje ohuaya. Majoya jama poa ba'a: —Eyacuiñajji, jjiquio e'aquiana meseja mimishi cuijea'yocue pea'ai! —huohuime acandinaje Eyacuiñajji nijje mimianijo.

⁴ Quea pame nee Eyacuiñajji nijje emimijji etii epojji. Deja cuana mimi ajja Eyacuiñajji nijje jama ba'a: —Eya ca iña jamatii minijje emimijji etii poaje —jamaya mimime epojji pojjeama. Chojja. Eyacuiñajjiya oeyaya iyaa majje onijje emimijji etii po mee ca poa. Jamaya yahuajo nei ohuaya ebionei onijje emimijji etii Anoni bajjani aca poa.

⁵ Jamajjeya jamaya pea'ai Jesosa Quito Eyacuiñajji nijje emimijji etii jamatii po jjima poa. Oya Eyacuiñajjija eabaca poa. Eyacuiñajjiya ca ca oe Jesosa onijje emimijji nei po mee ca poa yahuajo nei nei. Jama poa ba'a: “Eyaya miya ojjaña ba mee aña cuana miya ca ca oe ecue Bacua Ejja. Eya ca ca iña mi que Chi” jamaya Eyacuiñajjiya Jesosa acanaje.

⁶ Majoya huohui ca poa jama pea'ai ba'a: “Miya enijje emimijji poaje'yo tii tii Menequisine jama. Oya yahuajo nei nei enijje emimijji nei po tiitia poa”.

Jamaya yahuajo nei nei Eyacuiñajjiya tehue mee ca poa esohui Jesusajo.

⁷ E'e, yahuajo nei Jesosa ese nijje nequiahua oya Eyacuiñajji nijje mimi huicha'a huicha'anaje jama ba'a: —Ecue Chii, ¡nahuecue mo! Onaaya eya quecuajea ca chana' —jamaya Jesosa mimi neineinaje Eyacuiñajji nijje. Quea yeno nee nee jjejojo panaje. Oya Jesosa quea ca'a pojjeama jjabaquinaje. Oja Chii quea bihui po mee sa acanaje. Jamajjeya onijje mimiajo Eyacuiñajjiya shajja'ajja canaje. Eyacuiñajjiya Jesosa mano'yo jjima po mee sa ajjima jojjemo Jesosa mano'yo jjima poquiaye.

⁸ Jesosa Eyacuiñajjiya Bacua Ejja oe nei. Jamatii oya quea nee nee poa mimishi cuaa quecua ca'yajje. Eyacuiñajjiya ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojaya eba ojjaña joya Eyacuiñajjiya esohui jayojja jama ba'e sa poani jjeya meshijo ba'e quea nee nee poaje onaa napa cajje.

⁹ Jamajjeya Eyacuiñajjiya Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epojji. Pea chama' mimishi cuijea'yojji —aca poa Eyacuiñajjiya.

Jamajjeya Jesusaa esejaya mimishi cuijea'yo majje ba'e tiitii mee caje'yo, joya o shajja'ajjajji poani nei.

¹⁰ E'e, yahuajo nei Eyacuiñajjiya oya huohui ca poa jama ba'a: “E'e jojo nei miya ojjaña jaahuana-jji poaje. Miya enijje emimijji etii poaje'yo tii tii; Menequisine jama, ma yahuajo nei enijje emimijji nei poa jayojja jama miya poaje'yo”.

¡Quea ja'a nee Jesosa nijje jjapeequicue!

¹¹ Ecuea esohui ma Eyacuiñajji nijje emimijji neijo, Menequisine bajjanijo apoa pojjeama. Maya jamatii quea camaja eba meeji. Miqúanaya ca ca oe jjashahuabaqui ajjaa jjejojo Eyacuiñajjija esohui oe pojji baña. Jamajjeya jiquio esohui miqúanajaya quea quehua poaje.

¹² E'e, miqúanaya yahuajo nei Jেসosaja epeeji poa. Jamajjeya miqúanaya aje oe epeeji eyacua esohui ehuohuinaje ese. Jamatii onaaya miqúanaya casohuihuohui huicha'a huicha'a cahua epeeji eyacua jayojja jama, de. Jiquio ecua ebacua jjeya cuaya tojjojo ba'e, bobi ijja po jjima jayojja jamaya miqúanaya Eyacuiñajjija esohui camaja'ama nei nei baña de, esohui ebionei camaja'ama ebajji jama.

¹³ E'e, ebacua jjeya cuaya tojjojo ba'e jayojja jama miqúanaya Jেসosaja epeeji eyacua jama; ojaya epeeji quea ja'a po jjima. Jamajjeya eba'ejji quea tai ma Eyacuiñajjija boti'ama miqúanajaya ba jjima, eba'ejji quea pame ma Eyacuiñajjija quea boti nee miqúanajaya ba jjima pea'ai.

¹⁴ Jiquio ecua etiiya bobi ijja cani jayojja jama Jেসosaja epeeji quea ja'a neeya ojjaña ojaya esohui ba cani. Eba'ejji quea mimishi amaja ajja, ma Eyacuiñajjija boti'ama. Quea pame nee acani ohuaya. Jamaya Jেসosaja epeeji quea ja'aa esohui huohui cani onajaya ebajji.

6

¹ Yahuajo Jেসosa nijje jjapeequi jeahuaa eseyaya shajja'ajjanaje Eyacuiñajjija esohui quehua'ama. ijjeja ca ca ojjaña ojaya esohui Jেসosaja bacue! ¡Quea ja'a nee pocue Jেসosaja epeeji etii! E'e,

yahuajo jjeya nei jjapeequi jeahuaa Jesusaja esohui quehua'ama shajja'ajjanaje jama ba'a: — ¡Miquea mimishi pajea'yocue! ¡Jesusaja epeeji nei pocue!

² ¡Onaaya miya cabeza mee cahua Jesosa nijje epojji! Onaaya miquianajaya esapajo eme' huana caje Edojjoshahua Pame miquianaa que edobiquijji. Eyacuiñajjiya emano'yo cuana shequi mee caje o'oya. Shajjama' cuana Eyacuiñajjiya quea nee nee po mee caje'yo —jamaya yahuajo Jesosa nijje jjapeequi jeahuaa eseyaya shajja'ajjanaje esohui quehua'ama.

³ ¡Jjeya ca oe Eyacuiñajjiya esohuijo ojjaña ejjashajja'ajjaqui Jesusaja epeeji quea ja'a nee epojji! E'e, jamaya poaje Eyacuiñajji nijje mimianijo jama ba'a: —Eyacuiñajji, ¡ecuana ba meesahuacue ojjaña miquea esohui!

⁴ E'e, beca cuana aje oe Eyacuiñajjiya esohui shajja'ajja majje jama poani ba'a: —Eya ecue mimishijo quea yeno. Mimishi pajea neineiye'yo Jesosa nijje ejjapeequijji —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjiya esohui quea pame e'e nei shajja'ajja canaje. Eyacuiñajjiya oya cuana quea pame nee acanaje. Ba mee canaje Jesusaa ba'e titii mee cani ojaya epeeji nei onijje eyajo. Ba mee canaje Edojjoshahua Pameya oya cuana jaahuana caje'yo pea'ai.

⁵ Ba canaje pea'ai Eyacuiñajjiya esohui quea pame nee nee jayojja jama ba'yanijo quea bei nee poaje'yo. Eyacuiñajjiya acanaje jayojja ma dejjaa ajjima acani ba canaje pea'ai. E'e, jamaya ojaya eba poanaje.

⁶ Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjiya Bacua acui ecueata'apeejo caca ca poa jayojja jama oya cuana Jesosa quecua'yojji jayojja poani. Jesosa cajaa ajji poani. Jesosa niñeba ca o'oyani ojjañaja eshajja'ajjajji. Quea tai nee nee ca ca oma.

⁷ Que quea pamejo ena po majamajajo bobi tii cuajiani quea pame nee. Apoa poajo equé meseya bobi chicha cani. Jamaya Eyacuiñajjiya quea pame nee nee po mee cani.

⁸ Que quea taijo ca ca bobi tii ajja. Jjono, acuisha, acui pojja'a pohuani. Jamajjeya equé meseya que cajaa acani jama ba'a: —Jiquio que jehua'yonaje, cajaa —acani.

Jiquio ecua equé meseya que cajaa acani jayojjaya jama acaje'yo Eyacuiñajjiya. Quea nee nee po mee caje'yo cuaquijo jiquio Jesosa cajaa ajji nei nei poani cuana.

Jesosa cajaa a'ajja eseya ohuaya e'e jojo nei ba'e tiitii mee caje'yo onijje

⁹ E'e Jesusaja epeeji cuana, jiquio eyaya esohui quea tecue tehueaña miquiana jjashajja'ajjaqui ajjajo. Jamatii miquianaya ecuea quea jea nee nee. Miquianajo jjashahuabaquiani jama ba'a: —Ecuea epeeji cuana, miquianaaya Jesosa cajaa yajji pojjeama. Chojja. Ojaya epeeji poanijo, Jesosaa

miquianaya ojaya esohui jama atiitii meesahua caje'yo —jamaya eya poani.

¹⁰ E'e, yahuajo, jjeya pea'ai miquianaaya Jesusaja epeeji cuana quea jea nee añajo pea cuana ba'e meesahuaña tii quea ja'a nee. Jamajjeya Jesusaja epeeji cuana quea jea añajo Jesosa quea jea nee aña pea'ai. Jamaya Eyacuiñajjiya eba. Jama-jjeya ohuaya quea pame nee nee sosequia caje'yo quea pame nee miquiaaya añajo. E'e, ohuaya quea ja'a nee acani tii tii.

¹¹ Cuanaya eyaya miquianaya huohuiaña jama ba'a: ¡Jesusaja epoe o'oyajjiyo ishoacue! ¡Jamaya atiitiicue! ¡Quea jaji nee ba'e tiitii poquicue ojjaña Jesusaja epeeji cuana nijje! Jamajjeya ecuea eba poaje e'e jojo nei miquianaya Jesusaja epeeji nei onijje ba'e tiitiije'yo.

¹² E'e, yahuajo Eyacuiñajjiya eseya jama acanaje ba'a: —Eyaya miquianaya ba'e tiitii meeje'yo enijje —oya poanaje.

Jamajjeya ja'a quea huea pojji! Eyacuiñajjiya epeeji nei jama jashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jashahuabaquijji ohuaya jama ajjima e'acaje poso!

Eyacuiñajjiya jiquio ecua ohuaya huohui canaje jamaya acani e'e jojo nei

¹³⁻¹⁴ E'e, yahuajo nei nei Eyacuiñajji miminaje esejaya etiiquiana nijje, Amajama nijje jama ba'a: “Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya

ca ca oe nei quea ca'a nee nee poanijo jamaya ameeje'yo. Chama' pea e huoo-jea'yojji poani”.

Jamaya Eyacuiñajjiya aca poa.

¹⁵ Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei nei poa. Jamajeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

¹⁶ Esey aca ca jama poani ba'a: —E'e jojo nei jiquio ecua eyaya huohuiaña jama neiya eyaya aje.

Jamaya po majje pea huasijje poquiani dejja etii yasijje jama huohuiya ba'a: —¡Ecuea esohui etehue'yojo miquea bajjani tehuecue ojjañaja ebajji e'e jojo nei eyaya ecuea esohui aje! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya aña.

Jamajeya dejja etiija bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

¹⁷ Oya jayojja Eyacuiñajjiya ojaya epeeji cuana jama acani ba'a: —E'e jojo nei ma ecua eyaya miqianaya huohuinaje jamaya eyaya miqianaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjañaja ebajji.

18 E'e, Eyacuiñajjiya ma ecua ohua huohui ca poa jayojjaya jama acaje'yo. Oya siajje po ajja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bhui nee nee! Jiquio ecua bishe jaadobiquiajo, onaa jono jea cajo seya iñacuajiaña ehui'i'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo.

19 E'e, acui ca'aca'ajo bishe ai jeyo cani cuaa edo-jojea ca poajejje, ehui'i'yo poajejje jayojja jama eseya Jesosa nijje jjapeequiani ese jaahuanajji, ese nahuejji, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimijji etii cuana Eyacuiñajjija equi yasijje dobiqúi majje equi do-jojo pea equecuayijji sisi yasijje dobiqúi majamajanaje daquija secue pene yasijje. Ma equecuayijji sisi yasijje Jodio cuana oe nei dobiquinaje Eyacuiñajji nijje mimiya ojjañaja mimishi cui-jea'yojji. Jesosa ca ca eyahuasijje dobiqúi'yonaje. Jjeya oya Eyacuiñajji pejejo yani. Onijje mimiani esejo.

20 E'e, ese eyahuasijje poqui jjimahuajo, Jesosa eyahuasijje poqui'yonaje. Huohui canaje jama ba'a: —Ecuea epeejji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neinei quijji.

Jamajjeya Jesosa Eyacuiñajji nijje emimijji oe nei quea ca'a nee nee poani. Jamaya oya po tiitii'yani. Yahuaajo nei nequi Eyacuiñajji nijje emimijji Menequisine bajjani jayojja jama poanaje Je-

sosa.

7

Menequisine Eyacuiñajji nijje emimijji nei poa (Genesis 14)

¹ E'e, jiquio Menequisine yahuaajo nei nei nequia poa. Oya Sanemi cuiñajji meshi mese poa. Eyacuiñajji nijje emimijji nei pea'ai poa. Eyacuiñajjiya quea ca'a nee neeya oya jamaya po mee ca poa. Jamajjeya yahuaajo nei etiiquiana Amajama pea emeshi mese quea mimishi cuana quecua jeyojeyo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

² Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epojji; jama aca poa ba'a: Amajama aquiana ome miji pea'ai huisome, 10 huisome yanijo ohuaya oe quia ca poa Menequisineja epojji. Peapea aquiana cuana ojjaña aquiana jamaya aca poa. Menequisineja bajjani Ese Ejjaja esohuijo jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pea'ai oya Sanemi cuiñajji meshi mese poanijo.

³ Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pea'ai, ojaya ebacua ecuanajaya bajjani ba jjima pea'ai. Oya ache shono cuaya poa ba jjima, ache shono mano'ya poa ba jjima pea'ai. Chama' etehue'yo poa. Eyacuiñajjiya ca pa ca

oe Menequisine huohui ca poa jama ba'a: — Menequisine, ¡miya enijje emimijji nei pocue! ¡Jamaya po tiitiicue! —aca poa. Oya jayojja Eyacuiñajjiya oja Bacua Ejja huohui ca poa pea'ai.

⁴ Jamejjeya ¡jjashahuabaquicue Menequisinejo! Dejja etii quea pame nee nee oya poa. Amajama ca ca dejja etii quea pame nee pea'ai poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji.

⁵ Amajama mano'yajo, quijje nei Moisesiya Amajamaja osecua Nemi bajjani Eyacuiñajjiya esohui huohui ca poa, Anonija bacua ejja. Jama aca poa ba'a: “Nemi miya, miquea ebacua cuana pea'ai Eyacuiñajji nijje emimijji poaje'yo Jodio cuanajo. Jamajjeya Jodio cuaa miya caquia cahua aquiana eba'ejji, jama caquia cahua ba'a: Ojaya ome miji pea'ai, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua” jamaya Eyacuiñajjiya esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana.

⁶ Menequisine ca ca yahuajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeya Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahuajo nei Eyacuiñajjiya Amajama huohui ca poa jama ba'a: “Amajama, jiquio meshi miquea poaje'yo.

Miquea osecua cuanaja poaje'yo tii tii” aca poa Eyacuiñajjiya. “Miquea osecua cuana quea huiso nei nei poaje'yo” aca poa pea'ai.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjiya! —aca poa.

⁷ E'e, Eyacuiñajji nijje emimijji Menequisine bajjani Amajama nijje miminaje Eyacuiñajjiya oya quea ca'a epo meeji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeya quea pame nee neejo Amajama oya iye huiso aquiana cuana quia ca poa.

⁸ Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua ejja cuana huasijje. Jamatii ma Eyacuiñajji nijje mimi-ani cuana mano ca poqui'ya poa. Menequisinejo ca ca Eyacuiñajji esohui jama poani ba'a: —Menequisine, ¡miya enijje emimijji nei po tiitiicue! —poani.

⁹⁻¹⁰ Menequisine yahuaajo ba'ya poa Amajamaja osecua jea jjimahuaajo. Amajamaa iye huiso aquiana Menequisine quia canaje. Jamajjeya Jodio cuaa huohui cani jama ba'a: —Amajamaa aquiana quia ca poa; Nemiya pea'aiya aquiana quia canaje, oya Amajamaja osecuaja cuiisa' dojjojo nequiahuaa —jamaya Jodio poani Nemijo, oja osecua cuanajo pea'ai. Jamatii quijje nei Nemiya, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca po-

quia poa ojaya epojji, ojaya osecua cuanaja epojji pea'ai.

¹¹ Eyacuiñajjiya Nemi, oja bacua cuana pea'ai huoojea ca poa onijje emimijji epojji, ojaya esohui Jodio cuana ba meesahuaajji, quea ja'a eba'e meesahuaajji pea'ai. Jamatii oya cuana aje oe de jja cuana poa, Eyacuiñajjiya epeeji pishana poa. Jamajjeya Eyacuiñajjiya esohui jayojja jama ba'e tiitii jjima poa. Jamajjeya Eyacuiñajjiya pea onijje emimijji nei huoojea canaje, Nemija osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji niije emimijji nei poanaje, Anoni jama pojjeama. Oya Jesosa Eyacuiñajji niije emimijji nei Menequisine jayojja jama poanaje. E'e, Jesusaa ca ca oeyaya eseya Eyacuiñajjiya esohui jayojja jama ameesahua cani.

¹² E'e, Moisesija esohui jayojja jama Anonija osecua cuana Eyacuiñajji niije emimijji cuana poa. Jjeya ca ca Eyacuiñajjiya pea onijje emimijji po mee canaje, oja Bacua Eja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesusaja esohui jayojja jama, yahuajo jama pojjeama. Jamajjeya Eyacuiñajjiya eseya ba ca'yani mimishi'ama'yo.

¹³⁻¹⁴ E'e, yahuajo Eyacuiñajjiya Jesosa jama aca poa ba'a: —Jamajjeya miya enijje emimijji nei poaje'yo ecuea epeeji cuanajo —Eyacuiñajjiya aca poa.

Jamatii Jesosa Nemija osecua pojjeama poa. Pea oya de, etiquiana Jodaja jeaja osecua. Joda ca ca Eyacuiñajji niije emimijji nei pojjeama poa. Jama-

jjeya Jodaja jeaja osecua cuanaja aquiana cuana dahua jjima poa mei e'iya sohujajo Eyacuiñajji quea bei mimishi cuana nijje epo meejji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjiya Jesosa jama aca poa ba'a: —Miya enijje emimijji nei nei poaje'yo ecuea epeeji cuanajo.

¹⁵ Jamajjeya ecuea esohui Eyacuiñajji nijje emimijji jjeya miquianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemija osecua pojjeama.

¹⁶ Jamajjeya Jesosa ca ca oe Eyacuiñajji nijje emimijji nei poanaje, Eyacuiñajji hoojea'yo, dejjaja, Moisesija pea'ai hoojea pojjeama. Oya Jesosa quea ca'a nee nee, enequi tiiti'yo pea'ai. Jamajjeya oya Eyacuiñajji nijje emimijji nei poanaje ojaya epeeji cuanajo.

¹⁷ Yahujajo nei Dabiya Eyacuiñajji esohui tehue ca poa jama ba'a: “Miya enijje emimijji nei poaje'yo ecuea epeeji cuanajo. Jamaya poaje'yo tii tii, enijje emimijji nei Menequisine jayojja jama” jamaya Eyacuiñajji poanaje Jesosa Quito nijje.

¹⁸⁻¹⁹ Etiiquiana Moisesija esohui ajji poani yahujajo quea pame pojjeama ba'ya poa. Mimishi'ama po mee jjima poa. Jamajjeya etiiquiana Moisesija esohui jayojja jama jjeya apajea ca'yonaje. Jjeya ca ca eseya Jesusaja epeeji poanijo ojaya esohui jayojja jama ba'yani, yahujajo jayojja jama pojjeama. E'e, Jesosa Eyacuiñajji nijje mimiani esejo. Eyacuiñajji

bacua cuana eseya po mee cani. Jamajjeya ba'e tiitii mee caje'yo onijje eyajo.

²⁰⁻²¹ E'e, Eyacuiñajjiya Jesosa huohui ca poa jama ba'a:

“Eya Eyacuiñajji quea ca'a nee enequi tii tii quea ja'a nee. Ecuea esohui jayojja jama eyaya e'e jojo nei aje'yo. Eyaya jama huohuiaña ba'a: —Miya ecuea cuana epeejjijo mimi tiitiije'yo enijje”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijje emimijji, ese ba'e tiitii mee'yojji. Yahuaajo nei Nemija osecua cuana onijje emimijji poanijo Eyacuiñajji ojjaña nijje mimi jjima. Jjeya Jesosa Eyacuiñajji nijje mimianijo ca ca Eyacuiñajji ojjaña ese nijje mimi-ani.

²² Jamajjeya esejaya eba e'e jojo nei Eyacuiñajjiya esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee. Jamajjeya ohuaya ojjaña ojaya epeejji cuana onijje ba'e tiitii mee caje'yo. Ma ohua Moisesi huohui ca poa ca ca quea pame pishana: Ojaya esohui jayojja jama ba'e neineiajo ojaya ehabaca poaje'yo, Eyacuiñajjiya.

²³ Nemi nequi tiitii ajja poa Eyacuiñajji nijje pea cuanajo emimijji tii. Dejja tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijje emimijji etii cuana. E'e, oe mano'yo majje oja bacua Eyacuiñajji nijje emimijji etii poa. Jamaya popoquia poa quea huiso nee nee.

²⁴ Jesosa ca ca eshe, mano'yo ajja tii tii. Jamajjeya oya Eyacuiñajji nijje e'e jojo nei mimi tiitiani

esejo, oja epeeji cuanajo.

²⁵ E'e, Jesosa mano'yo ajja, eshe tii tii nequi'yo Eyacuiñajji nijje esejo emimijji. Jamajjeya Jesusaja epeeji nei poanijo Eyacuiñajjija bacua cuana poani. Ohuaya eseya ba'e tiitii mee caje'yo onijje eyajo.

²⁶ Eseya aje oe quea mimishi jjejojo Eyacuiñajjija esohui jayojjaya jama ba'e jjima poaje. Jesusaa ca ca esejaya mimishi cuijea'yo majje ba'e tiitii mee caje'yo onijje. E'e, Jesosa oe nei quea pame nee nee, mimishi'ama nei nei, quea boejea nee nee, dejja mimishi jayojja jama pojjeama tii tii. Oya eyajo oja Chii pejejo nequi, ojjaña huoojea'yojji poani tii tii.

²⁷ Nemija osecua Eyacuiñajji nijje emimijji cuana aje oe Jesosa jayojja jama pojjeama poa. Ohuaya ca ca oe quea mimishiya jjejojo ojjaña pojajajo aquiana cuana dahuajea caninaje Eyacuiñajji quea bei po meeji. Aquiana dahuajea jjimahuaajo Eyacuiñajji nijje miminaje jama ba'a: —Eyacuiñajji, ¡ecuea mimishi cuijea'yocue! — jamaya Eyacuiñajji nijje emimijji etii Nemija osecuaa aca poquia poa.

Majoya oya cuana mimishijo aquiana dahua-jea majje Eyacuiñajji nijje miminaje pea cuanajo jama ba'a: —Eyacuiñajji, ¡miquea epeeji cuanaja mimishi cuana cuijea'yocue! —aca poquia poa Eyacuiñajji nijje emimijji etiiya.

Jesosa ca ca jama pojjeama. Oya mano'yonaje ojjañaja mimishi cuijea'yojji sosejje. Oya apoa po'yonaje, emano beca'yojji pojjeama tii.

²⁸ Jamajjeya etiiquiana Moisesija esohuijo dejja cuana Eyacuiñajji nijje emimijji po mee ca cuaa

poa, Nemija osecua cuana. Oya cuana aje oe Eyacuiñajjija esohui jayojja jama ba'e'yo jjima poa. Jamajjeya Moisesi nijje mimi majje quiije nei Eyacuiñajjiya oja Bacua Ejja Jesosa jama aca poa ba'a: “Miya oe nei mimishi'ama nei nei. Jamajjeya miya oe nei enijje emimijji nei poaje'yo ecuea epeeji cuanajo” jamaya Eyacuiñajji poanaje.

8

Eyajo Jesosa Quito nequi tiitiani esejo Eyacuiñajji nijje mimiani tii tii

¹ Jamajjeya ijashahuabaquicue Jesosa Quitojo! Oya Eyacuiñajji nei nei. Eyajo nequi tiitiani esejo Eyacuiñajji nijje mimiani tii tii. Eyacuiñajji quea ca'a nee nee pejeje nequi, ebianeij mijiije; onijje ojjaña huoojeajji poani tii tii.

² Jama ba'a: Yahuaajo nei Jodio Eyacuiñajji nijje emimijji etii daqui equi dojjo huasijje, equecuayijji biso nei yasijje dobiq'ya poa Eyacuiñajji nijje mimiya, Jodio cuana nijje Eyacuiñajji quea bei epojji. Ma daqui equi Jodio cuanaja soco poa Eyacuiñajjija esohui shajja'ajjajji. Jesosa ca ca dobiq'yonaje Eyacuiñajji e'anioque ani yasijje tii, daqui equi dejjaja soco huasijje pojjeama. Jomajo oya Eyacuiñajji nijje mimiani esejo.

³ Jiquio Jodio cuana Eyacuiñajji nijje emimijji etii cuana babaca majje jama poa ba'a: —¡Miyaya aquiana dahuacue ijjiacajji ehuone' pea'ai; Eyacuiñajji ecuana nijje quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijje emimijji neiya, Jesosaa Eyacuiñajji quea bei po

mee canaje ese nijje. Esejaya mimishi cuana cui-
jea mee'yojji sosejje oya mano'yonaje.

⁴ Jesosa meshijo enequi jojjemo oya Eyacuiñajji
nijje emimijji etii pojjeama pome. E'e, Jodioja
Eyacuiñajji nijje emimijji etii cuana meshijo yania
poa, Nemija osecua cuana. Moisesija etehue'yo
jayojja jama aquiana dahua ca poquianinaje Ey-
acuiñajji quea bei po meejji.

⁵⁻⁶ Jamaya yahuajo poa ba'a: Moisesi eyiyo
huasijje jaasohuaquiajo, Eyacuiñajjiya oya huohui
ca poa daqui equijo. Jama aca poa ba'a: “¡Ecuea
esohui jayojjaya nei daqui equi acue! ¡Quea
bame nee nee oe acue!” ca poa Eyacuiñajjiya.

Jamatii daqui equi iya mee ca poa ona ba mee-
jji ma ohua quiije Jososaa acaje'yo eyajo. Ja-
majjeya Jodio cuanaja emimijji Eyacuiñajji nijje
quea pame pishana poa. Jesosa ca ca quea pame
nee nee. Jamaya pea'ai Eyacuiñajjiya yahuajo nei
ojaya esohui huohui ca poa Moisesija etehue'yojji.
Ma esohui etehue'yo quea pame poa. Quiije ca
ca Eyacuiñajjiya esohui eyacua Jesosa huohui mee
ca poa. Maya esohui quea pame nee nee. E'e,
esohui ma ohua jjeya huohui ca poa jayojja jama
eseya añajo, Jososaa eseja ba'e tiitii mee caje'yo
onijje eyajo. Jamaya eseja eba. Jamajjeya eseja
quea jaji nee poani. Yahuajo Jodio cuana quea jaji
pishana poa: Onajaya ba jjima poa Jososaja esohui
eba'e tiitii'yojji onijje eyajo.

⁷ E'e, yahuajo nei Eyacuiñajjiya Jodio cuana Moi-
sesi nijje nequi ba mee ca poa ojaya esohui. Ja-
matii ma esohui jayojja ohuaya acani mimishi
pajea'yo jjima poa cuanaja. Ma esohui jayojja

jama ba'yanijo mimishi cuijea'yojji jojjemo Eyacuiñajji Jesosa huoojea jjima poquiaye esohui eyacua huohuiya.

⁸ Jamajjeya Eyacuiñajjiya ojaya epeeji cuana tecuea ca poa. Jama tecueame aca poa ba'a:

“Quijje eyaya esohui eyacua huohuije ojjaña Jodio cuanaja eshajja'ajjajji, ma Isaenija osecua cuanaja, Jodaja osecua cuanaja pea'ai eshajja'ajjajji.

⁹ Yahuaje nei eyaya miquijanajaya etiiquiana Ejito meshijo ba'e pea meshi yasijje dojo meesahuanaje. Ecuea esohui quea pame nee huohui huicha'a huicha'a meenaje pea'ai. Jamatii etiiquiana cuana shajjama' poa. Ecuea esohui jayojja jama a sa po'yo ajja poa. Jamajjeya eyaya oya cuana jaahuana jjima a poa. Jamajjeya eyaya pea esohui quea pame nee aje'yo miquijana nijje. Jiquio esohui eyacua poaje, yahuaje jama pojjeama poaje. Eyaya jamaya huohuiaña”.
Jamaya Eyacuiñajji poanaje.

¹⁰ “Quijje eyaya Isaenija osecua cuana esohui eyacua huohuije jama ba'a: Jamajjeya miquijanaya jjashahuabaqui meesahuaje ecuea ejjashahuabaquiiji jayojja. Ecuea esohui jayojja jama eyaya miquijanaya ameesahuaje: —Eyacuiñajjiya ecuana jaahuana cani — miquijanaaya aje. Eyaya miquijanaya saja'aje'yo: —Miquijanaya cuana ecuea epeeji nei e'e jojo nei —eyaya aje'yo.

¹¹ Miquijanaya enijje jjapeequije'yo ojjaña, edejja tii cuana, esho'iquiana pea'ai. Jamajjeya pea nijje jama epo majajji pojjeama ba'a: —¡Eyacuiñajji

nijje oe jjapeequicue! —e'a majajji pojjeama cuana. Chojja, oya jja iña ojjañaja eba poaje'yo aña.

¹² Jamajjeya eyaya ojjaña cuanaja mimishi cuijea neinei'e'yo. Majoya eya jjashahuaba majajji ajja miquianaja mimishijo. Quea bei poaje. Jamaya eyaya Isaenija osecua cuana huohuije”.

Jamaya Eyacuiñajji yahuajo nei nei poa Isaeni nijje.

¹³ E'e, jiquio ecua daqui chii chii'yajo eyacua jjeshe majje daqui echii seya jeajeaña jayojja jama esohui eyacua amajje Eyacuiñajjiya esohui yahuajo nei Moisesi oja tehue meejo jjashahuaba neinei meequi'yo jjima aca poa: —¡Ecuea esohui eyacua jayojja jama acue; esohui yahuajo jayojja jama pojjeama! —jamaya Eyacuiñajjiya eseya huohui cani jjeya.

9

Jodio etiquianaja daqui equi Eyacuiñajjiya esohui bajji

¹ Yahuajo nei Eyacuiñajjiya Moisesi huohui ca poa jama ba'a: —¡Jamaya oe enijje mimicue! ¡Jamaya eya bihuiacue pea'ai! —aca poa—. ¡Equi iyacue enijje emimijji! —aca poa pea'ai.

² Jamajjeya Jodio cuaa daqui equi soco majje iya ca poa Eyacuiñajjiya esohui shajja'ajajji, ma Moisesi tehue mee ca poa jayojja jama e'ajji. Jamajjeya yahuajo nei iya ca poa jama ba'a: Ebionei equi equecuayijji ai'ai nequia ca poa. Ma equecuayijji ai'aijoya cuaquijji nequijji nequia ca poa,

baa huo'o. Majoya acui quecuashiyo, mesa, quecua ca poa. Mesa quecuajeyo majje cuia'asha ca poa baa huo'ohua. Majoya mesa biajje pahui ojjaña pojajajo iya majamaja ca poa piatojo Eyacuiñajjija ebajji. Ma quecuayijji ai'ai bajjani ca poa Eyacuiñajji Nijje Ejjapeequijji bajjani.

³ Majoya biso nei quecuayijjime aca poa daqui equi yiyedojojjo. Majoya daqui moohua secue pene ca poa. Daqui moo quea bame nee ba'ehuana ca poa esecue jjani queyajji. Ma quecuayijji biso nei bajjani ca poa Eyacuiñajji Ese Nijje Emimijji Quea Bame bajjani.

⁴ Ma quecuayijji biso neijo nequia ca poa cuaqui cojjasha anijji baa huo'o, shiyeshiye dahuajji. Shiyeshiye dahuajea cajje huichacha quea shiye nee nee ba'esohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajjija Eshui Etehue'yo Huanajji bajjani. Ma cajohuijo baa huo'o tahuoo e'ianobia ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjiya etiiquiana cuana Moisesi nijje ijja mee ca poa. Anonija tojje acui ejaquecua ca'aquijji ma cajohui dojojjo ehuananobia jaa poa, ma tojjejo yahuajo pohua poa acui iña. Beca mei beje pea'ai cajohui dojojjo ania poa, ma mei bejejo yahuajo nei Moisesija tehue'yo Eyacuiñajjija esohui mei beje biajje oja tehue'yo, 10 esohui etehue'yo jaa poa.

⁵ Cajohui biajje ania poa cuichojji nisho esohuidojojji jayojja. Quea bame nee nee, baa huo'o pea'ai. Oja ecuichohua queya ca poa cajohui. Ma esohuidojojji nisho cajohui yasijje cojja nequia

poa. Ma ba majje Jodio cuana jashahuabaqui'ya poa Eyacuiñajji onijje yani, oja mimishi cuijea'yojji. Jamatii jjeya miya ecuea ehuohuijji pojjama ojjaña joya daqui equijo nequi aquiana.

⁶ Ojjaña equi apoa poajo, Jodioja Eyacuiñajji nijje emimijji etii dobiquia poa equecuayijji ai'ai yasiije. Ojjaña pojjajo dobiqui nequia poa Eyacuiñajjija yajjijo chacohua.

⁷ Jamatii equecuayijji biso nei yasijje oe nei dobiqianinaje Eyacuiñajji nijje emimijji etii. Pea eshequiaja cuanajo oe dobiaquime poaninaje. Ohuaya ijjiacajji ehuone na' dojodobiaqui caninaje. Majoya Eyacuiñajji nijje mimianinaje jama ba'a: —¡Eyacuiñajji, ecuea mimishi cuijea'yocue! E'e, jiquio ijjiacajji eyaya ehuone' cuia'yonaje ecue mimishi cuijea'yojji sosejje —poaninaje oya.

Majoya jama poaninaje pea'ai ba'a: —¡Ojjaña miquea epeejjija mimishi cuijea'yocue pea'ai! E'e, jiquio ijjiacajji ehuone' eyaya cuia'yonaje ojjañaja mimishi cuijea'yojji sosejje —poaninaje. Jamaya oya po majamaja anijo, ojjaña oja mimishi cuana pajea'yo jjima acaninaje cuaa.

⁸ Jamajjeya jashahuabaquicue daqui equijo, Jodio cuanaja iyajo! Jamaya ma daqui equi enequiojoya jjeya Edojjoshahua Pameya eseya ba meesahua cani jama ba'a: Ma daqui equi e'anijo tii ma equecuayijji biso nei yasijje oe nei Eyacuiñajji nijje emimijji etii dobiqianinaje Eyacuiñajji nijje mimiya, ojjaña cuana dobiqui jjima poanaje.

⁹ E'e, Eyacuiñajji nijje mimiani etii oe nei nei dobiqianinaje Eyacuiñajji nijje mimiya. Ma shahuaba majjeya esejaya eba ojjaña cuana

Eyacuiñajji nijje mimi meemee ajja poa. Jjeya ca ca eseya Eyacuiñajji nijje mimije, ojjaña. Yahuajo nei quea huiso ijjiacajji ehuone' dahuajea caninaje Eyacuiñajji ona nijje quea bei epojji. Dahuajea majamaja caninaje. Jamatii oya cuana jjashahuabaquianinaje jama ba'a: –E'e pojja'a eya quea bojea pojjeama. E'e pojja'a ecuea mimishi cuijea'yo jjima –poaninaje cuana.

¹⁰ Yahuajo nei bobijo tehue ca poa pea'ai Moisesija etehue'yojo jama ba'a: –¡Beca bobi a'a ijji-ajji! ¡Beca e'ishijji pea'ai a'a jja oe ishijji! –jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiiquianaa piato, shajjajji cuana pea'ai shacua caninaje pea'ai. Ma etehue'yo jayojja jama besa majamajaninaje pea'ai. Jamajjeya etehue'yo jayojja jama besa majje quea yami bojea poa, jamatii quea mimishi tii poa, quea jjashahuabaqui tai. Eyacuiñajjiya oya cuana Moisesija etehue jayojja jama amee caninaje Jesosa poe jjimahuajo. Jesosa ca ca oeya ojjaña mimishi cuijea'yojji poani.

Jesosaja ena' cuayaquia poa eseja mimishi cuijea'yojji

¹¹ Jamajjeya jjeya Eyacuiñajji huoajea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimijji nei eyacua. Ohuaya eseya quea pame nee nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayijji biso nei yasijje dejja cuanaja iya huasijje dobiqii jjima Jesosa

Eyacuiñajji nijje esejo mimiya. Cho. Oya eyahuasi-
jje dobiquinaje Eyacuiñajji e'anioque ani yasijje,
eyiye biso nei quea pame nee nee jayojja huasijje.
Oya Jesosa Eyacuiñajji nijje mimiani esejo.

¹² Jesosaa chivo na', ana'ai na' dojodobiaqui
jjima eyahuasijje, de. Cho. Oya acui
ecueata'apeejo mano'yonaje esejaya mimishi
cuijea'yojji sosejje. Jamajjeya ohuaya eseya ba'e
tiitii mee caje'yo onijje.

¹³ E'e, yahuaajo nei Moisesija etehue'yo jayojja
jama acaninaje cuaa. Jamajjeya Eyacuiñajji nijje
emimijji cuaa ana'ai na', chivo na' pea'ai tepe
jayojja huasijje sho majje ojjaña Jodio cuana jeasi-
jijea majamaja caninaje. Majoya ana'aija bacua
dahuajea'yo majje oja yami equiyojeyojea pohui
ena tejjee nane majje ojjaña Jodio cuana jeasiji-
jea majamaja caninaje. Jeasijijea cajo, pea Jodio
cuaa ona ba caninaje quea boejea jayojja. Jamatii
eyami nei quea boejea jayojja poaninaje. Mimishi
ca ca ecuijea'yo pojjeama.

¹⁴ E'e, ana'ai na', chivo na' pea'ai jeasijijea cajo,
eyami ca ca oe quea boejea jayojja poaninaje.
Jesosa Quito ca ca quea pame nee nee ese mimishi
cuijea'yojji, de. Edojjoshahua Pame enequi tii tii.
Ohuaya Jesosa ameesahua canaje Eyacuiñajjija
ejjashahuabaqui'yojji jayojjaya. Oya Jesosa
mimishi'ama nei nei, mimishi'ama tii tii poanaje.
E'e, oya acui ecueata'apeejo mano'yo majje ojaya
ena' cuayaquinaje. Jamajjeya ohuaya esejaya
mimishi cuijea caje'yo onijje jjapeequiyajo: —
Ecue Chii, ecue na' cuayaquinajejo eyaya ecuea
epeejjija mimishi cuana cuijea neineiye'yo —
Jesosaa aca poa.

Jamajjeya Jesusaja epeeji nei poajo, Eyacuiñajjiya eseya quea bojea nee nee po mee cani ojaya ejjashahuabaquiji jayojja jama eba'e'yojji, etiiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiya jjejojo.

¹⁵ Ojjaña joya etiiquianaja Moisesija esohui jayojja jama ajji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yojji sosejje. Jamajjeya eseya Jesusaa huohui cani jama ba'a: —Eyacuiñajjiya miquianaya ojaya esohui huohui ca o'oyani esohui eyacua jama ba'a: “Eyaya miquianaya quea pame nee nee aje'yo. Ojjaña ecue babaca'yo enijje ba'e tiitii meeje'yo eyajo” jamaya Eyacuiñajji poani —Jesusaa aca poa.

¹⁶⁻¹⁷ Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuaa.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yojji pojjeama. O mano'yajo ca ca oe jjeshe ca'yojji.

¹⁸ Oya jayojja yahuajo nei Eyacuiñajjiya oja sohui tehue mee majje Moisesi aquiana quecua mee ca poa. Moisesi jama aca poa ba'a: —¡Aquiana ehune' quecuajea'yocue! Oja na' cuayaquiajo eyaya baje miquianaaya e'e jojo nei ecuea esohui jayojja jama aña ecuea epeeji nei epojji —Eyacuiñajjiya aca poa.

¹⁹ Jamajjeya Moisesiya ojjaña Eyacuiñajjiya esohui etehue'yo huohui caninaje ojjañaja esha-

jja'ajjajji. Majoya ijjiacajji ehuone', ana'ai, chivo pea'ai cuia caninaje. Aquiana na' tepejo sho caninaje ena tejjee. Majoya ñajjajja ña huo'o acui aa quea shiyejo cuiabebo caninaje. Majoya ena tejjee nane majje esohui etehue'yo jeasiji caninaje, ojjaña Jodio cuana jeasijijea caninaje pea'ai aquiana naa.

²⁰ Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miquianaya jeasijijeaña ijjiacajji naa. ¡Eya ena' jeasijijea jama pocue ba'a: “E'e, eseyaya ojjaña Eyacuiñajjiya esohui jayojja jama aje'yo tii” acue! —Moisesiya aca poa.

²¹ Jamaya pea'ai Moisesiya daqui equi acaninaje, ojjaña daqui equijo nequi aquiana pea'ai jeasijijea caninaje ijjiacajji naa, ojjaña.

²² Jamaya acaninaje ojjaña Jodio etiiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pea'ai. Jamaya Moisesiya sohui etehue'yo poa. E'e, Eyacuiñajjiya jama aca poa ba'a: —Ijjiacajji ehuone' quecua cajo oja na' cuayaquiyajo, eyaya miquianajaya mimishi cuijeaje'yo —aca poa.

Jamajjeya ena' cuayaqui ajjajo aje oe mimishi ecuijea'yojji pojjeama.

Jesosa Quito mano'yonaje mimishi cuijea neinei ca'yonaje

²³ Jamajjeya ijjiacajji na' jeasijjeya cajje ojjaña daqui equijo nequi aquiana quea boejea'yo jayojja po mee ca poa Jodio etiiquiaa. Jamaya acajo Eyacuiñajjiya ma aquiana ba ca poa quea boejea'yo jayojja. Jamaya Eyacuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neijo nequi mee caje'yo eyajo. E'e, aquiana naa jeasijjeya cajje pojjeama eseya, Jesosaja epeeji cuana quea boejea nee poaje'yo.

²⁴ Oya jayojjaya Jodioja Eyacuiñajji nijje emimijji etii equecuayijji sisi yasijje dobiquia poa Jodio cuana nijje quea bei epojji. Jamaya Eyacuiñajjiya eseya ba mee cani Jesosa Quito eyahuasijje dobiqui'yonaje Eyacuiñajji nijje esejo mimiya. Jesosa ca ca daqui equi yasijje pojjeama dobiqui'yonaje. Cho. Eyahuasijje dobiqui'yonaje. Jjeya nei oya, Jesosa Quito Eyacuiñajji cojja neijo nequi, onijje esejo mimiani de, Eyacuiñajji ese nijje quea bei epojji.

²⁵ Yahuaajo nei jamaya poa pea'ai ba'a: Jodio Eyacuiñajji nijje mimiani etii equecuayijji biso nei yasijje dobi majamaja quianinaje. Pea shequiajajo dobiaqui poaninaje, pea shequiajajo dobiqui poaninaje. Oe dobiquime poaninaje oe shequiajajo. Pea ena' dojodobiaqui caninaje, aquiana ehuone na'. Aquiana na' jeasijjeya majje jama acaninaje ba'a: —Eyacuiñajji, jecuanaja mimishi cuana cuijea'yocue! —poaninaje.

Jesosa Quito ca ca ojjaña shequiajajo pojjeama mano'ya poa. Mano'yonaje oe nei mano'yome

poa. Ojaya ena' cuayaquinaje esejaya mimishi cuijea'yojji sosejje.

²⁶ Jesusaja ena' aquiana na' jayojja jama poa joggemo oya mano majamaja quiaye. E'e, de-
jja pana'yo majje mano majamaja quiaye quea
huiso nee nee, de. Jamatii Jesosa mano'yonaje oe
mano'yome poanaje, quea huiso pojjeama. Jamaj-
jeya jjeya nei ojjaña Eyacuiñajjiya esohui beshahua
nei apoa poanijo, Jesosa mano'yonaje. Ojaya ena'
cuayaquinaje mimishi cuijea'yojji.

²⁷ Esey aje oe manoje'yo pea'ai; oe nei
mano'yome poaje'yo. Mano'yo majje Eyacuiñajji
cojja neijo nequije'yo. Ohuaya huohui caje
quio ese ba'ya poa sosejje. Eseyaya quea pame
ba'yaninajejo ba'e tiitii mee caje'yo onijje eyajo.
Quea mimishi ba'yaninajejo ca ca quea nee nee
po tiitii mee caje'yo.

²⁸ Jamajjeya Jesosa Quito mano'yonaje, oe
mano'yome poanaje pea'ai. Oya mano'yonaje
mimishi cuijea'yojji ojjañaja. E'e, yahuajo Jesosa
Quito mano'ya poa. Quijje oya poeje o'oya
mimishi cuijea'yohua pojjeama. Poeje'yo ojaya
epeeji ba'e tiitii mee'yohua, ojjaña joya ojo
jja'ishoa'ajjaquiani jjehua'yohua.

10

Ijjiacajji ehuone naa jeasijjea cajo mimishi ecui- jea'yo pojjeama

¹ Jodio Eyacuiñajji nijje mimiani cuaa Moisesija
etehue'yo jayojja jama amajamaja caninaje. On-
ajaya ba jjima pishana ma Eyacuiñajjiya quijje
eseya quea pame nee nee acaje'yo. Onajaya quea

ja'a pojjeama. Eyacuiñajji nijje mimiani cuaa quea huiso aquiana biajje ena' jeasijjea cajje Eyacuiñajjiya ma aquiana cuana ba ca poa quea boejea jayojja. Ojjaña shequiajajo ijjiacajji ehuone' quecua majamaja majje jama poaninaje ba'a: — Eyacuiñajji, imiquea epeeji cuanaja mimishi cuijea'yocue ojjaña! —acaninaje Jodio cuaa.

Jamatii Eyacuiñajjiya etiiquianaja mimishi cuijea neinei'yo jjima aquiana ehuone' cuia ca'yajo.

² Jamajjeya aquiana ehuone' cuia ca'yajo etiiquiana quea boejea nee nee epo mee jojjemo aquiana cuia majamaja jjima aca quiaye. E'e, oya cuana quea boejea nee nee epo mee jojjemo mimishijo yeno'ama poquiaye.

³ Jamatii ijjiacajji ehuone' ojjaña shequiajajo cuia majamaja caninaje. Jama poaninaje ba'a: — Eyacuiñajji, imiquea epeeji cuanaja mimishi cuijea'yocue! —acaninaje.

Cuia majje jama po ajja poaninaje ba'a: — Jjeya ca ca ecuanajaya mimishi chama'yo poaje — ajjima acaninaje. Cho. Jama poaninaje ba'a: — Ecuana quea mimishi, de —Jodio etiiquiana cuana poaninaje.

⁴ Chojja, ana'ai na', chivo na' pea'ai jeasijjea majje mimishi cuana ecuijea'yojji pojjeama.

⁵ Jamajjeya Jesosa Quitohua poe jeahuaa oja Chii jama aca poa ba'a:

“Ecue Chii, miquea epeeji cuana aquiana ehuone' nequi cuia mee sa po'yo ajja, miya. Aquiana ehuone' dahuajea mee sa po'yo ajja pea'ai miya. Cho. Miyaya eya dejja cuana huasijje huoojeaña yamijji.

⁶ E'e, miquea epeeji cuaa aquiana ehuone' cuia cani mimishi cuijea'yojji nisho mi quea bihui nee po meeji nisho. Ma ohua dahuajea cajoya miya quea bihui nee pojjeama poani.

⁷ Jamajjeya eyaya miya jama anaje ba'a: —Ecue Chii, eya meshi yasijje poeyanaje. Miquea ej-jashahuabaqui'yojji jayojjaya jama eyaya aje'yo. Jamaya yaya aje'yo mi quea bihui nee po meeji”. Jamaya yahuajo oja Chii Eyacuiñajji Jesosa Quito-hua acanaje.

⁸ E'e, Jesusaa oja Chii jama acanaje ba'a:
 “Ecue Chii, miquea epeeji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yojji nishojo aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama”.

Jamaya acanaje Jesusaa, jamatii yahuajo Moisesija esohui etehui'yo jayojja jama Jodio cuanaa aca poquianinaje, ehuone' cuia majamaja ca poquianinaje.

⁹ Jamajjeya majoya Jesusaa jama acanaje ba'a:
 “Ecue Chii, eyaya miquea ejjashahuabaqui'yojji jayojja jama aje'yo mi quea bihui nee po meeji”. Jamaya acanaje.

Jamajjeya Jesosa Quito poeyanajejo ca ca oe Eyacuiñajjiya eseya jama acani ba'a: — ¡Jesusa Quito jayojja jama pocue, oe! ¡Ecuea ejjashahuabaqui'yojji jayojja jama oe atiitiicue! Jjeya ohuaya eseya huohui maja ajja jama ba'a: — ¡Jodio etiiquiana yahuajo nei nei ba'ya poa jayojja jama acue! ¡Ehuone' cuia'yo majje dahuajea'yocue

miquea mimishi ecuijea mee'yojji! —Cho. Jamaya Eyacuiñajjiya eseya amaja ajja.

¹⁰ Jamajjeya Jesosa Quitohua Eyacuiñajjiya ejjashahuabaqui'yojji jayojja jama acanaje. Mano'yonaje; oe mano'yome poanaje eseya mimishi cuijea'yojji. Jamajjeya Eyacuiñajjiya eseya mimishi cuijea'yo majje quea boejea po mee ca'yani Jesosaja epeeji nei cuana.

¹¹ Yahuaajo nei Jodio Eyacuiñajji nijje mimiani etii ojjaña pojjaajo daqui equijo chachochaconaje. Ehuone' cuia majamaja caninaje mimishi cuijea mee'yojji nisho. Ecuiajea'yojji cuiajea ca'yaninaje de, mimishi cuijea'yo jjima poa.

¹² Jesosa Quito ca ca Eyacuiñajji nijje emimijji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayojja jama pojjeama poanaje oya. Mano'yonaje mimishi cuijea'yojji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejejeo anioque'yonaje, ebianeij mijiije. Eyacuiñajji nijjeya ojjaña huoojea'yojji poani oya, Jesosa.

¹³ Majoya jjeya ohuaya ishoa ca ani Eyacuiñajjiya eshahua cuana, ojjaña ojaya epeeji pojjeama, shajjama' cuana pea'ai jeabichajea'yo majje quea nee nee po mee caje'yo tii tii.

¹⁴ E'e, Jesosa acui ecueata'apeejo mano'yonaje; ojaya epeeji mimishi'ama po mee ca poa. Jamajjeya eseya Eyacuiñajjiya esohui jayojja jama ameesahua cani.

¹⁵ Edojjoshahua Pameya pea'ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeejiija ebajji. Ebioneij jama poa ba'a:

16 “Quijje eyaya miqúanaya esohui eyacua huohuije. Jamajjeya miqúanaya jjashahuabaqui meesahuaje ecuea ejjashahuabaquijji jayojja. Ecuea esohui jayojja jama eyaya miqúanaya ameesahuaje”.

17 Majoya ohuaya jiquio esohui tehue mee ca poa: “Jamajjeya eyaya ojjaña cuanaja mimishi cuijea neineije'yo. Majoya eya jjashahuaba majamajaqui ajja miqúanaja mimishijo. Quea bei poaje”.

Eyacuiñajjiya jama tehue meemeya aca poa.

18 Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehuone' quecua maja ajja pea'ai, ¿ajeo equecua'yojji? Jesosa mimishi cuijea'yojji quea pame nee poanaje.

¡Jesosa chipi nei ejjapeequi!

19 Yahuajo Jodio Eyacuiñajji nijje mimiani cuana quea mete dobiquia poa daqui equecuayijji biso nei yasijje. Dobiquia poa Eyacuiñajji nijje mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yojji. Jama-jjeya Jesosaja epeejji cuana, jjeya Eyacuiñajji nijje emimi mete'ama nei.

20 Yahuajo nei Eyacuiñajji nijje emimijji etii oe nei daqui esecuejje equecuayijji biso nei yasijje dobiqúaninaje Eyacuiñajji nijje mimiya. Jjeya eseya Eyacuiñajji nijje mimiani, ojjaña. Jesosa esejo mano'yonaje. Jjeya oya eshe, enequi tii

tii. Jamajjeya eseya mimi majamajani Eyacuiñajji nijje.

²¹ Oya, Jesosa Eyacuiñajji nijje emimijji nei esejo pea'ai. Eseyá jaahuana tiitii cani, ojaya epeeji nei.

²² Jamajjeya eseya ojaya epeeji e'e jojo nei poanijo Eyacuiñajji nijje emimi. E'e jojo nei emimi tii tii onijje. ¡A'a jama pojji ba'a: —¡Dee! Eya quea mimishi Eyacuiñajji nijje emimijji —a'a jamaya pojji! Cho, esejaya mimishi cuana cuijea ca'yonajejo eseya quea boejea nee'yo.

²³ Eyacuiñajjiya ojaya esohui jayojja jama acaje'yo. Siajje po ajja oya. E'e jojo nei eseya ba'e tiitii mee caje'yo onijje eyajo. Jamaya esejaya eba. Jamajjeya ¡ejjapeequi onijje nei!

²⁴ ¡Jesosaja epeeji cuana quea jea nee ejja'aqui! E'e, ¡ejjashahuabaqui pea epeeji cuanajo, o ba'e meesahuajji, Jesosajo echaco sahuajji pea'ai!

²⁵ Beca epeeji cuana aje oe jjachicha pajeaquinaje; ojee Eyacuiñajji bihuia ajja po'yonaje. ¡A'a oya cuana jayojja jama pojji! ¡Ojee ejjachichaqui! Jesosaja epeeji cuana nijje emimi jama ba'a: —¡Quea bihui pocue! ¡Jesosa nijje jjapeequicue ecuana nijje! —ejja'aqui.

E'e, Jesosa Quito esejaya Emeshi Mese nei poeje'yo. Jamajjeya oe jamaya epo tiitii.

¡Jesosa Quito a'a cajaa ajji!

²⁶ Beca cuana aje oe Eyacuiñajji esohui e'e nei ba majje jamatii quea mimishi po tiitii sa poani. Jamajjeya ojaya mimishi ecuijea'yojji pojjeama. E'e, Jesosa ca ca oe mimishi cuijea'yojji. Pea chama'.

27 Jamajjeya Eyacuiñajjiya ojjaña shajjama' cuana jeajea caje'yo cuaqui yasijje onijje mi jjapeequi'yajo. Quea nee nee po tiitii mee caje'yo.

28 Yahuajo nei Jodio etiiquiaa Moisesija etehue'yo jayojja jama mi atiitii cajo, cuiajea ca'yaninaje, dejja etii cuaa. Beca dejja cuaa oya jayojja huohuime acajoya jama ba'a: “Oya ca ca oma shajjama', Moisesija esohui jayojja jama a sa po ajja. ¡Cacuiajea ca'yahua cuaa ca oma!” jama huohuime acajoya cuiajea ca'yaninaje dejja etiiya. Chama'yo tii aca'yaninaje cuana.

29 Oya jayojjaya jjeya beca cuana Eyacuiñajjiya Bacua Ejjajo, Jesusajo mimipanajeapanajeani. Cajaa acani quea mimishi nee neeya jjejojo. Eyacuiñajjiya esohui quea pame nee ojjaña ba mee canaje jama ba'a: —Jesosa mano'yonaje miquianajaya mimishi cuijea'yojji —jamaya ba mee canaje.

Jamatii beca cuana siajje poani jama ba'a: — Jesosa dejja mimishi jayojja jama mano'yonaje, jamatii.

Edojjoshahua Pameya ojjaña quea pame jaahuana sa acani. Jamatii beca cuana Edojjoshahua Pame shajja'ajja sa po'yo ajja. Cajaa acani. Oya cuana quea tai nee nee poani. Jamajjeya oya cuana quea nee nee po mee caje'yo tii tii Eyacuiñajjiya. Yahuajo nei Moisesija etehue'yojo shajjama' poanijo ca ca quea tai pishana. Jamatii quecuajea ca'yaninaje cuaa.

30 E'e, esejaya eba Eyacuiñajjiya yahuajo tehue mee ca poa jama ba'a:

“Eyaya eyaye nei dejja mimishi quea nee nee po meeje'yo. Ojjaña joya pea cuana quea nee

poani eyaya quea nee nee po meeje'yo". Jamaya Eyacuiñajji poa pea'ai ba'a: "Ecuea epeejji quea mimishi poajo, eyaya oya cuana ejjabahuejjaquijji quea nee po meeje". Jamaya Eyacuiñajji poa pea'ai.

³¹ Jamajjeya iquea mete nee nee capoahua ojjaña joya Jesosa Quito cajaa ajji poani, de! Eyacuiñajjiya oya cuana quea nee nee po mee caje'yo. Oya ca ca oe nei eshe nequi tii tii, quea ca'a nee nee.

Jesosa nijje jjapeequi majje iquea ja'a nee po tiiti-icue!

³² Ecuea epeejji cuana, ijjashahuabaquicue! Yahuaajo Jesosa nijje jjapeequi jeahuajo miquianaya ojaya epeejji quea ja'a nee poanaje. E'e, Eyacuiñajji esohui shajja'ajja majje miquianaya onijje jjapeequinaje. Edojjoshahua Pame miquiana que dobiquinaje pea'ai. Jamajjeya Jesusaja epeejji pojjeama cuaa miquianaya napa canaje quea huiso. Miquianaya quea nee poanaje. Jamatii Jesosa nijje jjapeequi pajea ajja poanaje, jjapee neineiquinaje.

³³ E'e, Jesusaja epeejji pojjeama miquiana nijje mimijajinaje quea huiso ojjañaja eshajja'ajjajji. Miquianaya napa canaje pea'ai. Quea nee po mee canaje. Jamatii miquianaya mete'ama poanaje. Onaa Jesusaja epeejji napa canijo, miquianaya onijje jjapeequinaje, Jesusaja epeejji cuana nijje.

³⁴ Ejeanobia jaa huasijje pea'ai miquianaya poquinaje mete'ama Jesusaja epeejji cuana baa, ona bobiaa. Miquianaya ejeanobia jaajo aquiana siijea ca'yonaje cuaa. Jamatii miquianaya yeno'ama poanaje. Quea bihui miminaje jama

ba'a: –Ecuana Jesosa epeeji poanijo ohuaya ecuana quea pame nee nee acaje'yo quijje. Ecuana ba'e tiitii mee caje'yo onijje eyajo — poanaje miqianaya.

³⁵ Jamajjeya ¡a'a jja oe Jesosa nijje jjapeepajeaqui'yojji! Onijje jjapee neinei-quianijo, ohuaya miya quea pame nee acaje'yo. Eyajo miya quea huiso sosequia caje'yo pea'ai.

³⁶ E'e, ¡quea bihui nee atiitiecue Eyacuiñajjija esohui jama! ¡A'a hueahueajji! Jamaya miquiaaya atiitiiyajo, ohuaya miqianaya quea pame nee nee acaje'yo. Ojaya esohui yahuajo ohua huohui ca poa jamaya ohuaya acaje'yo. Miqianaya ba'e tiitii mee caje'yo onijje eyajo.

³⁷ E'e, Eyacuiñajjija esohui yahuajo nei etehui'yo jama poa ba'a:

“¡Ishoa socue ojaya epoeji! Jjeya nei pojja'a oya poeje'yo, quijje nei pojjeama.

³⁸ Ojjaña joya enijje jjapee tiitiquiani eyaya baña mimishi'ama, quea boejea'yo. Enijje jjapeepajeaqui'yo ca ca ecuea boti'ama; quea nee po meeje'yo”.

Jamaya esohui etehui'yo poa.

³⁹ Ecuana ca ca jamaya pojjeama. Jesosa nijje jjapeepajeaqui'yo ajja tii. Jamajjeya Eyacuiñajjiya ecuana quea nee nee epo mee'yojji pojjeama. Cho. Ecuana Jesosa nijje jjapee tiitiquianijo ohuaya ba'e tiitii mee caje'yo onijje eyajo.

11

Beca etiquiana Eyacuiñajjija epeeji nei poa

1 Ecuea epeejji cuana, esejaya eba nei nei jama ba'a: Jesosaja epeejji poanijo e'e jojo nei Eyacuiñajjiya ojaya esohui jayojja jama eseya acaje'yo. Jamajjeya eseya jama poani ba'a: —E'e jojo nei Jesosa quea huiso esohui huohui canaje; jjeya beca cuana esejaya quea quehua. Jamatii quijje eseyaya baja'yo.

2-3 Jamajjeya Jesosaja epeejji poanijo eseyaya baña Eyacuiñajjiya ojjaña tii pana ca poa. E'e, oya jama poa ba'a: —Meshi cuana, jJapanaquicue! —jamaya acajje meshi jJapanaquia poa. E'e, yahuajo nei ojjaña chama' nei nei poa. Jamatii Eyacuiñajjiya ojjaña pana ca'ya poa.

E'e, etiiquiana pea'ai Eyacuiñajji nijje jjapee-quianijo, ojaya esohui jayojja jama acanijo pea'ai, Eyacuiñajji ona nijje jama poa ba'a: —Miquianaya ecuea epeejji poanijo eyaya miya baña quea pame nee poani —aca poa.

Etiiquiana Abeni bajjani Eyacuiñajjija epeejji nei poa

4 Abeni Eyacuiñajjija epeejji poanajejo ojaya esohui jayojja jama aca poa quea pame nee. Jama-jjeya ijjiacajji ehuone' dahuajea cajo Eyacuiñajji bihuiajji, Eyacuiñajji onijje miminaje jama ba'a: —Abeni, miya quea ja'a nee anaje. Jamaya ecuea quea boti nee. Jamajjeya eyaya miya baña mimishi'ama —Eyacuiñajji poa.

Abenija o'iya Cainiya Eyacuiñajjija esohui jayojja jama pojjeama aca poa. Quea pame pojjeama aquiana quia ca poa Eyacuiñajji bihuiajji. Jama-jjeya Cainija quia'yo Eyacuiñajjija boti'ama poa.

Jamajoya Caini jjashahuabaquinaje jama ba'a: — Eyacuiñajjija Abeni quea jea nee poani. Ojaya eya boti'ama. Jamajjeya eyaya Abeni cuijeaje'yo — aca poa Cainiya. Jamatii ecuanaja eba Abeniya Eyacuiñajjija esohui jayojja jama aca poajo ojaya epeeji nei poa. Abeniya quea pame aca poajo es-eya jjashahuabaqui majje Eyacuiñajji nijje jjapeequi quea pame nee.

Etiiquiana Enoca bajjani Eyacuiñajjija epeeji nei poa

⁵ Enoca Eyacuiñajjija epeeji nei nei poa pea'ai. Jamajjeya oya mano'yo jjima. Eyacuiñajjiya oya jjequisohua ca'ya poa eyahuasijje eshe tii. Onijje nequi dejja cuaa oya sa'ajja ca'ya poa. Chama' ba ca'ya cuaa poa. Eyacuiñajjija esohui yahuajo nei nei tehue ca poa Enocajo jama ba'a: “Eyacuiñajjija esohui jayojja jama aca poajo Eyacuiñajji quea bihui nee poa Enocajo” jamaya tehue ca poa.

⁶ E'e, Eyacuiñajji nijje jjapeequi ajjajo, ojaya esohui jayojja jama a'ajjajo, Eyacuiñajji ojjaña ese nijje quea bihui nee pojjeama poaje. Ojjaña joya Eyacuiñajji nijje jjapeequi sa poani cahuohui cahua jama ba'a: —Ecuea eba Eyacuiñajji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

Etiiquiana Noe bajjani Eyacuiñajjija epeeji nei poa

⁷ Noe Eyacuiñajjija epeeji nei pea'ai poa. Jamajjeya Eyacuiñajjiya oya huohui ca poa jama ba'a: —Ojjaña meshijo ba'e cuana hui'ijeaje'yo ena jjayehuequijajo. Ohuajea caje ojjaña tii — Eyacuiñajjiya aca poa.

Noeja ba jjima poa ena quea quemo nee poaje. Jamatii ohuaya Eyacuiñajjija esohui shajja'ajja ca poa. Bishe, nacha quea quemo nee nee iya ca poa ojaya, oja bacua cuanaja edobiquijji, hui'i'yo jjima epojji. Jamajjeya Eyacuiñajji onijje mimia poa jama ba'a: —Noe, miya ecuea epeeji poani. Ecuea esohui jayojja jama añã. Jamajjeya eyaya miya baña mimishi'ama —aca poa.

Noeya Eyacuiñajji shajja'ajja ca poajo, eseyaya baña pea cuana aje oe shajjama' nei nei poa.

Etiiquiana Amajama bajjani Eyacuiñajjija epeeji nei poa

⁸ Amajama Eyacuiñajjija epeeji nei poa. Jamajjeya Amajamaa shajja'ajja ca poa Eyacuiñajji onijje mimiajo. Jama poa ba'a: —Amajama, ¡miquea meshijo nequi cuayaqui'yocue! ¡Poquicue pea meshi yasijje, ma miquea ba jjima huasijje! Eyaya ma meshiya miya quiaje. Miquea eba'eji poaje'yo, miquea osecua cuanaja pea'ai poaje'yo —Eyacuiñajjiya aca poa.

Jamajjeya Amajamaa Eyacuiñajji shajja'ajja ca poa. Poquia poa jamatii oja ba jjima meshi yasijje.

⁹ Jamajjeya Eyacuiñajjija esohui jayojja jama poanijo oya ba'equi'ya poa pea meshi yasijje, ma Eyacuiñajjiya o huohui ca poa huasijje. Ma meshijo ba'e dejja pea poa. Jamajjeya Amajamaja equi iya jjima poa; daqui equijo ba'ya poa. Jamaya pea'ai poa oja bacua Isaaca, ojaya osecua Jacobo pea'ai.

—Jiquio meshi eyaya miya quiaje miquea eba'eji —jamaya Eyacuiñajjiya huohui ca poa

Amajama, oja bacua Isaaca, ojaya osecua Jacobo pea'ai.

¹⁰ E'e, Amajama jjashahuabaquinaje pea cuiñajjijo, cuiñajji eyacuajo, ma Eyacuiñajjiya eyajo iya canijo. Amajama jama poa ba'a: —Quijje eya Eyacuiñajjija cuiñajji eyacuajo ba'eje.

Etiiquiana epona Sana bajjani Eyacuiñajjija epeeji poa

¹¹ Sana Eyacuiñajjija epeeji nei poa pea'ai. Jamajjeya Sana pona tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjiya oya jjamejoqui meesahua ca poa ojaya epeeji nei poanijo. Sana jjashahuabaquia poa jama ba'a: —Eyacuiñajjiya huohui canaje Amajama ecuanaja ebacuajo e'e nei. Jamajjeya ma ecua ecuanaya ohuaya huohui canaje jamaya acaje'yo e'e jojo nei —Sana poanaje.

¹² Amajama Eyacuiñajji nijje jjapeequinaje pea'ai, oja sohuijo e'e nei jjabahuejjaquinaje. Jamajjeya dejja tii nojinoji majje, 100 shequiajame tii majje ebacua jea ca poa. Ehuanase etii nojinoji jjamejoquia poa, jamatii yahuajo nei bacuama' nei nei poa. Jamajjeya ojaya osecua quea huiso nee nee quijje jjapapaqui'ya poa. Majameta huisoajja poa, sico meeme ajja quea huiso nee nee. Meshijajijo ani mei sisi huisoajja poa.

Etiiquiana cuiñajji eyacuajo eyajo jjashahuabaquianinaje

¹³ Jiquio etiiquiana Eyacuiñajji nijje jjapee titiiquianinaje. Dejja tii majje mano'ya poa Eyacuiñajjija epeeji tiya. E'e, Eyacuiñajjiya oya

cuana huohui ca poa jama ba'a: —Eyaya miya jiquio meshi quiaje'yo miquea epojji, miquea osecua cuanaja epojji pea'ai.

Jamatii maya meshi ojaya pojjeama, mesena jjima poa: —Eyacuiñajjija esohui e'e nei, ohuaya meshi quea pame nee quijje quia caje'yo ecuanaja osecua cuanaja epojji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'o —poaninaje etiiquiana—. Meshijo ca jja ca oe ecuana eba'e tiitijji pojjeama. Eyajo ca ca oe ecuana ba'e tiitije'yo Eyacuiñajjija cuiñajji eyacuajo —jamaya poaninaje Amajama, Isaaca, Jacobo cuana.

¹⁴ E'e, oya jamaya poaninaje pea eba'ejjijo jjashahuabaquianinajo. Eba'ejji e'e jojo neiyo jjashahuabaquianinaje ojaya epojji tii tiijo.

¹⁵ Oya cuana jjashahuaba majaqui ajja poa meshijo, ma yahuajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo ajja. ¿Ajeo epoqui o'oyajji, de? —poanaje oya cuana.

¹⁶ Chojja. Oya cuana pea eba'ejjijo jjashahuabaquianinaje, eba'ejji eyacua quea pame nee neejo eyajo Eyacuiñajji nijje. Jamajjeya Amajama jama poa ba'a: —Eyacuiñajji, eya miquea epeeji.

Amajama jama poajo Eyacuiñajji etiiquiana nijje miminaje jama ba'a: “Miquianaya ecuea epeeji nei; eya quea bei nee miquianajo” aca poa. Jamajjeya Eyacuiñajjiya oya cuana ojaya cuiñajji eyacua quea pame nee yasijje ba'e mee caje'yo, ma ohua yahuajo eyajo pana ca'ya poa huasijje.

17-18 E'e, Amajama Eyacuiñajjiya epeeji nei poa. Yahuajo Eyacuiñajjiya oya huohui ca poa: “Amajama, miquea ebacua cuayaje” aca poa. Majoya Amajamaa ebacua cuayajo Isaaca bajjani aca poa. Majoya Eyacuiñajjiya Amajama jama aca poa ba'a: “Isaacaja bacua ca ca oe eyaya baña miquea ose-cua e'e nei, pea cuana ca chojja” aca poa. Jamatii quijje Eyacuiñajjiya Amajama jama aca poa ba'a: “Amajama, imiquea ebacua ejja oe nei Isaaca bajjani mei biajje huana majje yacua'yocue, dahua-jea'yocue!” Jamaya Eyacuiñajjiya Amajama huohuime aca poa a'a e'e jojo nei ohuaya shajja'ajja caje ebajji: “Eya e'e jojo nei Amajamaja quea jea neejo, ohuaya ecuea esohui shajja'ajja caje” poanaje.

19 Majoya Eyacuiñajjiya esohui shajja'ajja majje Amajamaa oja bacua ejja dojo ca poa eyacua'yojji nisho: —E'e, eyaya Eyacuiñajjiya esohui jayojja jama aje'yo; ecue bacua oe nei yacuaajeaje'yo — Amajama poanaje—. E'e, eya Isaaca yacua'yajo, Eyacuiñajjiya oya emano'yojaa shequi mee caje o'oya —Amajama poanaje.

Jamajjeya Isaaca yacua jjimahuajo Eyacuiñajjiya Amajama huohui canaje jama ba'a: “Amajama, ja'a miquea ebacua Isaaca yacua'yojji!” aca poa.

Jamajjeya Amajamaa Isaaca equi yasijje dojo ca o'oya poa, eshe. Beshahua nei Isaaca yacua ca'yonaje. Jamajjeya eyacua'yojaa shequi o'oya jayojja Isaaca poa.

*Etiqiana Isaaca, Jacobo, Jose pea'ai
Eyacuiñajjiya epeeji poa*

20 Isaaca Eyacuiñajjija epeeji nei pea'ai poa. Jamajjeya ojaya ebacua ejja Jacobo, Esao pea'ai huohui ca poa jama ba'a: —Jacobo, Esao pea'ai, ishajja'ajjacue mo! Ma ecua eya ohua huohui ca poa jayojja jama Eyacuiñajjiya acaje'yo miqiana nijje. Ohuaya miqiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaacaa.

21 Jacobo pea'ai Eyacuiñajjija epeeji nei poa. Jacobohua dejja tii majje oja bacua ejja Jose bajjanija bacua cuana huohui ca poa jama ba'a: —Ecuea osecua, Eyacuiñajjiya miqianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua ejja cuana.

Majoya Jacobohua Eyacuiñajji bihuia ca poa. Oya dejja tii nojinoji majje ojaya acui ejaquecua ca'aquijjijo nequisohuanaje Eyacuiñajji bihuiajji. Jama aca poa ba'a: —Eyacuiñajji, miya oe nei quea pame nee nee. Eyaya miya bihuiaña —aca poa Jacobohua.

22 Jose pea'ai Eyacuiñajjija epeeji nei poa. Jamajjeya tii nojinoji'yo majje mano'yo jjimahuaa Joseya oja bacua ejja huohui ca poa jama ba'a: —E'e jojo nei Eyacuiñajjiya eseya ojjaña Amajamaja pea osecua cuana nijje Ejito meshijo nequi cuayaqui meesahua caje'yo pea meshi yasijje epoqui'yojji, eseja meshi yasijje. Jamajjeya je mano'yajo ecuea esa' cuana dojo'yocue ecue meshi yasijje! Jjani ai yasijje huanado-biañaqui'yocue! —huohuime aca poa Joseya.

Etiqiana Moisesi bajjani Eyacuiñajjija epeeji nei poa

23 Moisesija chii, ojaya enaese pea'ai Eyacuiñajjija epeeji nei nei poa. Jamajjeya Ejito meshi meseya Panao bajjaniya ojjaña Ejito meshijo ba'e cuana Jodio cuana jama aca poa ba'a: —¡Jodio cuana, miquea ebacua cuaya jeahuajo cuei yasijje jeoqueajeacue! —aca poa.

Jamatii Moisesija chiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeoqueajea jjima aca poa. Ba majje jama aca poa ba'a: —¡iquio ebacua quea pame nee, quea ja'a nee nee —aca poa ejeajjiya.

Jamajjeya equijo huanaquehua ca poa pea beca peejjima ba'ime onaa ejaja ca'yo poajeje.

24 Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjija epeeji nei poa. Jodio cuana nijje ba'e'yo sa poa, oja huapa pojjeama nijje. Moisesiya Ejito dejja jama aca poa ba'a: —¡A'a eya nequiaa jama ajji ba'a: “Miya Panaoja bacuaseja bacua” a'a eya ajji! —Moisesiya aca poa.

25 Ejito dejjaa aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjija epeeji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po ajja neinei poa oya cuana quea mimishi poanijojo. Oya ca ca Eyacuiñajji nijje jjapeequi sa poa jamatii quea nee.

26 Jjashahuabaquia poa jama ba'a: — Eyacuiñajjija huoojea'yo ojjaña jaahuanajji quea tai nee acaje'yo mimishi cuaa. Eya quea nee capoahua pea'ai o jayojjaya. Jamatii, jamaya quea pame nee. Ejito dejjaja aquiana quea nahue

ecuea yani. Jamatii cajaa eyaya ajeaje –Moisesi poa. Ojaya eba poa Eyacuiñajjiya oya quea pame acaje'yo quijje onijje jjapeequianijo.

²⁷ Moisesi Eyacuiñajjiya epeeji nei nei poa. Panaohua ca ca Eyacuiñajjiya epeeji Jodio cuana nahue sa aca poa ojaya echacojji sosema' epojji; quea tai, quea mase oya poa. Jamatii Moisesi Panaojo mete'ama poa: –Eyaya ca iña Eyacuiñajjiya epeeji Ejito meshijo ani cuayaqui meesahuaje'yo ecuanaja meshi yasijje epoqui'yojji –jamaya Moisesiya Panao aca poa mete'amaa nei. E'e, Eyacuiñajji Moisesiya eba poa, jamatii Eyacuiñajji jjaba meequi ajjajojo ojaya ecojjaja ba jjima poa.

²⁸ Moisesiya Eyacuiñajjiya epeeji nei poaniya jjejojo Eyacuiñajjiya esohui jayojja huohuime aca poa Jodio cuana jama ba'a: –iÑajjajja cuiacue! Majoya cuia'yo majje jjeasijjeacue oja naa miquea esecue jjanijo esohuidojojjiya miquea ebacua ejja ecuiajeajji pojjeamajo, cojjasobo! Jamajjeya poeje shajjamaja bacua ejja cuiajeaa –Moisesiya aca poa.

Jamajjeya Moisesiya esohuidojojjiya Jodio cuana ebacua ejja cuia jjima amee ca poa. Majoya jamaya Jodio cuana ojaña shequiaja ojee ijja ca poa ebacua cuia'yo jjima aca poa shejo, epajea'yojji pojjeama jojoya.

²⁹ Jodio cuana Isaenija osecua cuana Eyacuiñajjiya epeeji poa yahuaajo nei Moisesi Jodio cuana jaahuana coojji poa. Jamajjeya Eyacuiñajjiya oya cuana bae huo'o ojje miji yasijje poqui mee ca poa ejiojji jaboje. Ba majje Ejito dejja jama poa ba'a: –iCua'a! iPoquicue ma ecua

Jodio dejja poquia bacue! –poa. Jamatii Ejito dejja epoquijji nisho po'ajja poa. Hui'i jeyojeyo'ya poa ojjaña. Enaa oya cuana jepajea ca poa.

³⁰ Isaenija osecua cuana Eyacuiñajjija epeeji poa Josoe o huoojea'yojji poanijo pea'ai. Jamajjeya Eyacuiñajjija esohui jayojja jama Jenico cuiñajji sahuajje jjajeacohuiqui nequi'ya poa. Quea huiso cahuime dobiqúi jjima, me oeje pea beca cahuime, 7 cahuime aca poa. Eyacuiñajjiya mei peeyi jaabichajea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjiya.

³¹ Epona Shajami bajjani, ma pea cojjoji yahuajo poa Eyacuiñajjija epeeji po'yonaje. Jamajjeya Josoeja huoojea beca dejja Jenico cuiñajji quehua baa dobiqúi Shajamiya oja equi yasijje iyaaquehua ca poa onaa equecua ca poajejje. Jamajjeya Josoeja sohuinano cuaa dejja mimishi quecuajea'yo majje Shajami quecu'yo jjima poa. Josoeya huohui ca poa jama ba'a: –¡A'a Shajamija huapa pojjeama quecuajji! –aca poa.

Jodio etiiquiana quea huiso Eyacuiñajjija epeeji poa

³² Pea etiiquiana quea huiso Eyacuiñajjija epeeji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjija esohui huohuijji Jodio etiiquiana poa. Jjeya ca ca eyaya ojaya cuanaja eba'ejjijo ehuohui jeyojeyojji pojjeama quea huisojojo.

³³ Oya cuana Eyacuiñajjija epeeji nei poanina-jejo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajea ca poa. Pea cuana ona huoojeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjiya. Pea cuana neonija, ibia naa ashaja ijjiia jjima poa Eyacuiñajjiya oya jjanaba cami meequi ca poa ojaya epeeji cuana e'ijjiia ca'yo poaje jjejojya.

³⁴ Pea cuana Eyacuiñajjiya jaahuana canajejo quiyo'yo jjima poa. Cuaqui jiji neiyo nequi quiyo'yo jjima poa. Pea cuana quehuajje poquicuaji meesahua ca poa dejja maseya equecua ca poaje jjejojya. Pea epeeji cuana ca'a'ama. Jamatii Eyacuiñajjiya quea ca'a po mee ca poa; dejja mase quea huiso cuana jeabichajea ca poa, Eyacuiñajjija epeeji pojjeama mete mee ca poa.

³⁵ Epona cuana quea yeno nee nee ebacua mano'yajo poa. Jamatii Eyacuiñajjiya ebacua cuana emano'yojaa shequi mee ca o'oya poa. Quea bihui nee po mee ca poa. Pea cuana ca ca dejja mimishiya quea nee nee po mee ca'ya poa. Quea nee neejo mano'ya poa. Oya cuana huohui ca poa dejja mimishiya: —¡Eyacuiñajji nijje jjapeequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajjija epeeji nei. Oya cajaa a'ajja tii ecuea. Eya ca ca iña mete'ama emano'yojji —saja'ame aca poa Eyacuiñajjija epeeji cuaa.

Jamajjeya aje oe quecua ca'ya cuaa poa. Ma epeeji nei jjashahuabaquianinaje jama ba'a: — Eyacuiñajjiya e'e jojo nei eya quea pame nee ba'e tiitii mee caje'yo onijje eyajo quiije —poa mano jjimahua.

³⁶ Dejja mimishi cuana Eyacuiñajjiya epeeji cuana najo soa neineinaje ojjaña ba canijo pea'ai. Napa canaje, cuiasejjajea canaje jjonohua, jeyo canaje cadena, jeanobiajeda canaje.

³⁷ Jajahuejjajea canaje meiya pea'ai. E'e, acui ijjiasejjameejjiya oya cuana ijjiasejjajea mee caninaje, esapa jajasejjajea ca poa baaa Eyacuiñajji a'a cajaa acaje'yo ebajji. Aema' poa; daquimajo ijjiacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjaña ba canaje dejja mimishi cuaa oya cuana quea tai nee nee aca poa, cajaa aca poa. Jama aca poa: —¡Dee! Jiquio dejja cuana quea tai, cajaa. ¡Ejjacuiajeaqui'yo! —aca cuaa poa.

³⁸ Jamajjeya oya cuana dejja masejo quea mete jjejojo quehuajje poquinaje. Cuajicuaiji poquinaje meshi quima huasijje, eyiyo huasijje, jjani yasijje pea'ai. Equi chamajo jjanijo ba'ya poa.

³⁹ Jiquio Jodio etiquiana Eyacuiñajjiya epeeji poa, quea pame nee. Eyacuiñajji jama poa ona nijje ba'a: —Miya ecuea epeeji nei quea pame nee nee, ecuea ehuohui jayojja jama aña.

Jamatii Eyacuiñajjiya ejjashahuabaquijji quea pame nee ajjima poa ona nijje jiquio meshijo ba'yanijo.

⁴⁰ Jamajjeya Eyacuiñajjiya oya cuana ishoa mee ca poa. E'e, Eyacuiñajji jjashahuabaquinaje ojjaña cuana quea boejea'yo epo mee'yojji; ojjaña

yahuajo nei cuana ba'ya poa, eseya jjeya nei ba'e pea'ai quea boejea'yo epo mee'yojji. Jamajjeya ojjaña eseya ojee ba'e tiitiije'yo quea boejea Eyacuiñajji nijje eyajo, ojjaña tii.

12

¡Eyacuiñajjija epeeji yahuajo ba'ya poa jayojja ba'ecue Jesosaja epeeji nei!

¹ Jamajjeya ojjaña Eyacuiñajjija epeeji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajjija epeeji nei poa. ¡Ecuana jayojja pocue! —poani.

Ecuana Jesosaja epeeji dejja cuajicuajiani jama. Mimishi ca ca aqui ana quea biquie eba'o ba'e jayojja. Jamatii ecuaaya ca'a'amaa jjejojo mimishi acuajiaña. Jiquio ecua dejja aqui ana abo po jjima cuajicuajiani jayojja jama eseyaya mimishi ejjapajea neinei'yo Jesosaja epeeji nei epo'yojji. Oya, Jesosa esejaya ecuaajicuaji meesahuajji jayojja. Jamajjeya ojaya ejjashahuabaquijji jayojja jama ejja'a tiitiiqui'yo.

² Jamajjeya ¡Jesosajo jjashahuabaquicue! Ohuaya yahuajo eseya onijje jjapeequi mee canaje. Jjeya ohuaya eseya onijje jjapee tiitiiqui meesahua cani. Jesosa jama jjashahuabaqui ajja ba'a: —Chojja de, eya acui ecueata'apeejo emano'yojji pojjeama —jamaya po jjima poa.

Chojja. Jesosa jama poanaje ba'a: —E'e, ojjaña enijje quea mimishi nee nee poaje. Jamatii eya ecue Chiiya huohui ca poa jayojja jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee

ojaya esohui jayojja jama amajje –jamaya Jesosa poanaje.

Jamajjeya Jesosa mano'yo majje Eyacuiñajji pe-
jjejo anioquenaje ebianeí mijijje ojjaña huoo-
jea'yojji.

³ E'e, ¡jjashahuabaquicue Jesusajo! Yahuaajo nei
mimishi cuaa onijje quea quene nee nee po majje
quea nee nee po mee canaje. Jamajjeya Jesusajo
jjashahuabaquianijo miquianaya quea yeno epo-
jji pojjeama onaa napa cajje. Onijje jjapeequi
pajea'yo ajja poaje.

⁴ Yahuaajo miquianaya ojee jjapeequianijo Je-
sosaja epeeji quea ja'a po'yonaje. Shajjama' po
jjima. ¡Bacue! Jesusaa oja Chiija ehuohui jayojja
ohua huohui cajo, mimishi cuaa quecua ca'ya
poa. Miquianaya ca ca mimishi cuaa cuia'yo jjima
Jesosa nijje jjapeequianijo.

⁵ ¡A'a pajea'yojji Eyacuiñajjija esohui etehue'yo!
Ejeajjiya oja bacua cuana tecuea cani ejjasha-
jja'ajjaquijji jayojja jama Eyacuiñajji ese nijje
miminaje:

⁶ “Ecuea ebacua cuana, ¡eyaya miquianaya
jjabahuejjaqui meeañojo shajja'ajjacue
mo! Eyaya miquianaya miquea mimishijo
tecueañojo ¡a'a quea yeno pojji! E'e,
ojjaña joya ecuea quea jea nee nee eyaya
jjabahuejjaqui meeaña. Ecuea ebacua
cuana eyaya tecueaña mimishi'ama epojji”.

Jamaya Eyacuiñajjiya, eseja Chii aiya eseya aca
poa.

⁷ Jamajjeya Eyacuiñajjiya miquianaya jjabahue-
jjaqui mee canijo, ¡a'a quea yeno pojji! ¡Onijje
mimicue jama ba'a: –Eyacuiñajji, miya ecue Chii

ai. Miyaya eya quea nee po meeaña eya miquea esohuijo ejjabahuejjaqui meeji —jamaya onijje mimicue!

E'e, jiquio ecua seya esejaya ebacua cuana tecueaña jamaya Eyacuiñajjiya eseya acani. Eseja bacua cuana eseyaya tecueaña ejjabahuejjaquiji.

⁸ Ojjaña ejeajji cuaa oja bacua cuana niñeshe'a cani. Ejeajjiya oja bacua tecuea jjima acani shajjama' poanijo onaya mimije jama ba'a: —¡Dee! Oja bacua pojjeama pojja'a, jamajjeya mi jjabahuejjaqui mee cani. Jea jjima jama, de —acaje cuaa.

Oya jayojjaya Eyacuiñajjiya ojjaña ojaya ebacua cuana jjabahuejjaqui mee cani shajjama' epojji pojjeama. Ohuaya miquianaya jjabahuejjaqui mee jjima acani ca ca miquianaya oja bacua pojjeama, peaja bacua pojja'a.

⁹ E'e, ejeajji cuaa eseya niñeshe'a cani esho'yahua ejjashajja'ajjaquiji. Jamajjeya oya jayojjaya esejaya Chii ai ejjashajja'ajja neineiQui; ohuaya eseya ba'e tiitii mee cani.

¹⁰ Eyacuiñajjiya esejaya Chii aiya ca ca eseya tecuea cani quea ja'a nee eba'eji. Jjabahuejjaqui mee cani o jayojja quea pame nee nee, quea boejea'yo nee epo tiitii meeji. Eseyaya ejeajjiya ca ca ojaya ejjashahuabaquiji jayojja jama eseya tecuea ca poa esho'yahua.

¹¹ Jjeya Eyacuiñajjiya quea nee po mee cani ejjabahuejjaqui meeji eseya quea bihui pojjeama, quea yeno poani. Jamatii quijje jjabahuejja neineiQui majje eseya quea jjashahuabaqui ja'a nee poaje, quea bei nee nee poaje.

¹² Jamajjeya ja'a quea yeno pojji jamatii quea camaja poanijo! ¡Quea ja'a nee oe jjapeequicue

Eyacuiñajji nijje!

¹³ Jamajjeya ¡ejiojji epi jaji neijje poquiani jayojja jama pocue! ¡Quea ja'a nee jjapeequicue Jesosa nijje! ¡Pea cuana jjapee neinei qui meesahuacue pea'ai Jesosa jayojja epojji!

¡Jesosa nijje a'a jjapee pajeaqui'yojji!

¹⁴ Ecuea epeeji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yojji pojjeama.

¹⁵ ¡Ba neineicue! ¡Ojjaña Eyacuiñajji nijje jjapee neinei qui meesahuacue onijje eba'e tiitii'yojji! A'a jja oe jama pojji ba'a: Acui ñña quea cuaja nee nee pejeje nequi majje mano'yo chana'. Oya jayojja dejja tecueya ojjaña o pejeje ba'e quea tecue po mee cani. Quea tecue po tiitiani, quea huiso quea quene po mee cani. Quea huiso quea mimishi po mee cani pea'ai. Jamajjeya ¡a'a quea tecue po majajji! Quea tecue po majjeya Eyacuiñajji pajea'yo chana'.

¹⁶ ¡A'a pea cojjojji pojji pea'ai! ¡A'a etiiquiana Esao bajjani jayojja jama pojji pea'ai! Ojaya, Esaoja, yahuaño nei Eyacuiñajjija esohui boti'lama poa. Ojaya ejjashahuabaquijji jayojja jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje sosejje aje mi sosequiaje'yo; ma cacaa quijjojea cajo eyaya miya quiaje'yo; ecuea pojjeama poaje'yo,

miquea poaje'yo —aca poa oja chahua Esaohua, jashahuabaqui jjima jayojja poa.

¹⁷ Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijje Esao oja chii nijje miminaje jama ba'a: —Ecue chii, ¡Eyacuiñajji nijje mimicue e jaahuanajji! —poa—. ¡Jama acue ba'a: “Eyacuiñajji, ¡ecuea ebacua cojjasobo Esao bajjani jaahuanacue!” acue! —jamaya Esaohua oja chii aca poa.

—Chojja, Esao. Yahuaajo eya jamaya miminaje Eyacuiñajji nijje mique chahuaajo, mijo pojjeama. Apoa —oja chiiya jama saja'ameya aca poa.

Jamajjeya Esao cajaa aca poa cojjasobo jayojja jama epojji pojjeama.

Jamajjeya Esao pa neineinaje, quea yeno nee nee poanaje oya chiija aquiana mesena'yo sajo. Jamatii oja chii ma ohua yahuaajo esohui huohui ca poajo pajeapajea'yo ajja poa pea esohui ehuhui o'oyajji. Eseyaya eba Esaoja esohui oja chahua nijje, oja chiija aquiana quia ca poa bobi sosejje. Jamajjeya oja chiiya oya cojjasobo jayojja pojjeama aca'ya poa.

¹⁸ Yahuaajo nei nei pea'ai Eyacuiñajjiya eyiyo Sinai bajjanijo nequiya esohui huohui ca poa; Jodio etiiquiana Moisesi nijje nequi quea mete nee nee poa. E'e, yahuaajo Jodio cuana eyiyo huasijje poe majje Sinai eyiyojo nequiñaquia poa. Eyiyo ba cañaquia poa jiji neineiqui. Quea bo moo eyiyo biajje nequia poa. Quea huichacha moo, quea

misi poa. Quea beni quemo pea'ai poa eyiyo biajje. Pojjeje baa siyoo pea'ai po nequia poa.

¹⁹ Taaa po neinei nequia poa, huaca she'ana quea quemo mia cani jayojja jama shajja'ajja ca poa Eyacuiñajjija emimi. Ma shajja'ajja majje quea mete nee nee poa etiquiana cuana Eyacuiñajjijo. Jama taaame aca poa ba'a: —¡Ecuana nijje a'a mimi o'oyajji! —taaa ca poa cuana quea ajjajja nee nee jjejojo.

²⁰ “¡A'a eyiyo huasijje jaasohuajji!” Eyacuiñajjiya aca poa. “¡A'a aquiana ehuone' jaasohua meejji pea'ai! ¡Jaasohuajo ca jajahuejjajecue meiya!” Eyacuiñajjiya aca poa.

²¹ Jamajjeya ojjaña tii quea mete nee nee poa. Ba majje etiquiana Moisesi pea'ai quea ajjajja nee nee poa: —Eya quea mete nee nee jjejojo piopioani —Moisesi poa.

²² Jjeya ca ca yahuajo jama pojjeama. Miquianaya ca ca Eyacuiñajjiya oja sohui ba mee canijo ¡a'a quea mete pojji! Miquianaya Eyacuiñajji ba'e yasijje poeyanaje. Ma eba'ejji eyiyo Sioni bajjani jayojja, ma Jenosanena eyacuajo nequi jayojja. Maya Eyacuiñajjija cuiñajji eyacua eyajo. Jomajo Eyacuiñajji ba'e tiitiiani, eshe. Ma cuiñajjijo Eyacuiñajjija esohuidojojji ejjanequichichiqui; quea bihui nee nee, quea huiso nee nee nequi, de. Sicosico meemee ajja, yajja sicome yajji quea huiso nee nee oya año.

²³ Jomajo Eyacuiñajjija epeejji cuana quea bihui nee nee Eyacuiñajji pejejo yani pea'ai ma yahuajo nei nei onijje jjapeequia poa. Eyacuiñajjiya oja bajjani cuana oja esohui etehue'yojo tehue ca poa

eyajo. E'e, miqúanaya Eyacuiñajji nijje jjapeequiani. Ohuaya ojjaña cuana meshijo ba'e sosequia caje ojjaña ma onaa acanaje sosejje. Jomajo, eyajo Eyacuiñajjija epeejji emano'yo cuanaja edojjoshahua cuana yani, ma yahuajo mimishi cuijea ca'ya poa cuana.

²⁴ E'e, miqúanaya Jesosa nijje jjapeequiani. Ohuaya ca ca oe eseya esohui eyacua huohui canaje eba'e tiitii mee'yojji. Esejo mano'yonaje pea'ai. Ojaya ena' cuayaquia poa esejaya mimishi cuijea'yojji sosejje. Oya Jesosa Adanaja bacua ejja Abeni bajjani jayojja jama pojjeama. Abenija ena' cuayaquiajo oja o'i Eyacuiñajjiya tecuea neinei ca poa echahua mese cuia ca'yajo.

²⁵ ¡Jamajjeya Eyacuiñajjija esohui shajja'ajjacue! ¡A'a shajjama' pojji! Yahuajo eyiyo Sinai pejjejo Moisesiya Eyacuiñajjija esohui huohui majamaja ca poa etiquianaja eshajja'ajjajji nisho. Jamatii aje oe shajjama' poa. Jamajjeya Eyacuiñajjiya oya cuana quea nee po mee ca poa. Jjeya Eyacuiñajjiya eyajo nequiya eseya huohui cani oja sohui eyacua, ma esejaya yahuajo shajja'ajja jjima. Shajjama' poajo e'e jojo nei ohuaya eseya quea nee nee po mee caje'yo, de.

²⁶ E'e, yahuajo nei Eyacuiñajjiya eyiyo Sinai bi-ajje sohuihuohui ca poajo, meshi huehuahuehua mee ca poa janobajjima nei. Jjeya oya jama poanaje ba'a: “Eyaya e'e jojo nei meshi, eyatahuatahua pea'ai huehuahuehua meeje'yo janobajjima nei nei” jamaya Eyacuiñajji poanaje.

²⁷ Jamajjeya Eyacuiñajjiya jama acajo ba'a: “Meshi, eyatahuatahua pea'ai huehuahuehua meeje'yo” acajo, esejaya eba ohuaya ojjaña oja

pana huehuahuehua mee'yo majje chama'yo tii poaje'yo ojjaña aquiána yahúajo oja pana'yo. Ojjaña aquiána eyacua ehuehuahuehua'yojji pojjeama anije'yo tii tii.

²⁸ Eyacuiñajji ojjaña huoojea'yojji poani tii tii. Chama' o jeabichajea'yojji epojji. Ese huoojea'yojji poani tii tii oya. Jamajjeya Eyacuiñajji ejjabihuiáqui jama ba'a: —Jamaya Eyacuiñajji, miya quea pame nee nee poani tii. Miya ecuana huoojea'yojji quea ca'a nee nee.

E'e, ¡Eyacuiñajjija esohui jayojja jama eba'e tii tii! ¡Oya ejjashajja'ajja tiitiíqui! ¡Quea mete epo tii tii; shajjama' pojjeama epo!

²⁹ ¡Ojo ejjashahuabaquí! Jiquio ecua cuaquíjo quiyo jeajea jeyojeyo yani jayojja jama Eyacuiñajjiya shajjama' cuana quea nee nee po mee caje'yo, de.

13

¡Jesosaja epeeji poanijo ba'ecue quea pame Eyacuiñajjija quea boti nee e'ajji!

¹ Ecuea epeeji cuana, ¡pea cuana Jesosaja epeeji pea'ai poanijo quea jea nee nee atitiícue huapa pojjeama jama!

² ¡Pea cuana miquíanajaya ba jjima quea jea acue! ¡Equi yasijje poeyajo quea pame nee acue pea'ai! ¡Míquianajaya equi yasijje iyaacue! Yahúajo beca cuana jama poanijo esohuidojojji jaahuana ca poa, jamatii oya ojaya cuana ba jjima esohuidojojji poa. Jjashahuabaquia poa jama ba'a: —E'e, jiquio dejja cuana ecuea ba jjima eyaya bobiaje — esohuidojojji pojjeama poso aca poa.

³ ¡Cuanaya baquicue Jesusaja epeeji joya ejeanobiajea jaa cuana! ¡A'a oya cuana pajea'yojji! ¡Jashahuabaquicue jama ba'a: —Eya ona jayojja jama ejeanobiajea jaa jjemo quea shoe, quea yeno pome. Jamajjeya eyaya oya cuana baquije, bobi quiaje, onijje jjapeequije —pocue!

¡A'a pajea'yojji Jesusaja epeeji quea nee poani onaa napa cajo pea'ai! ¡Jashahuabaquicue jama ba'a: —Onaa napa cajje eya quea nee pome, eya quea yeno pome. Jamajjeya eyaya oya cuana baquije quea bihui epojji. Ona nijje jjapeequije. Eyacuiñajji nijje mimije onajo pea'ai —pocue! ¡Jamajjeya oya cuana baquicue, ona nijje jjapeequicue!

⁴ Jjashahuabaquicue jama ba'a: ¡A'a jjacojjo-quijji! Yahueya, ¡miquea ehuanase oe nei jaahuanae! ¡Onijje tii jaacue! Ojjañaja eba jamaya quea pame nee. Jamajjeya ¡a'a quea mimishi pojji! ¡A'a pea cojjojji pojji yahue, ehuanase pea'ai! Jama poajoya Eyacuiñajjiya e'e jojo nei miquianaya tecuea neinei majje quea nee nee po mee caje'yo.

⁵ ¡A'a quea aquiana jea pojji! Eyacuiñajjiya eseya jama acanaje ba'a: “Eyaya miya epajea'yojji pojjeama nei nei. Eyaya miya ejeana'yojji pojjeama” poanaje.

⁶ Jamajjeya miquea aquiana eba'e meeji yanijo ¡quea bei pocue! Eshui yahuajo etehue'yo jayojja jama mimicue jama ba'a:

“Eyacuiñajjiya, Emeshi Mese neiya eya jaahuana caní tii tii. Jamajjeya eya mete'ama poani. Dejja mimishi cuaa eya ejeabichajea'yojji

pojjeama. Eyacuiñajjija eya ejaahuana pajea'yojji pojjeama”.

¡Jamaya mimi majamajacue!

¡Jjapee tiitiquicue Jesosa nijje!

⁷ ¡A'a pajea'yojji Eyacuiñajjija esohui huohuijji, yahuajo miqiuana sohui huohuijji poa! ¡Jjashahuabaquicue oya cuana quea ja'a nee ba'enaje Jesosa nijje jjapeequianijo! Mano'ya poa Jesusaja epeejji nei. ¡O jayojjaya Jesosa nijje jjapee neineiquicue!

⁸ E'e, Jesosa Quito oja sohui jayojja jama poani, pajea'yo ajja tii tii. Ojaya ejjashahuabaquijji yahuajo nei jayojjaya nei acani tii. Quijje nei jamaya atiitii caje'yo pea'ai.

⁹ Jamajjeya ¡peapea ehuohui'yo Jesusaja esohui e'e nei jayojja jama pojjeama a'a shajja'ajjajji! Pea ehuohui'yo shajja'ajja majje o jayojja mimishi mi po'yo chana'. Eyacuiñajjiya eseya quea jea nee nee acanijo esohui e'e nei ba meesahua cani Jesusaja epeejji quea ca'a nee epojji. Pea cuaa ca ca shajja'ajjacani esohui quea quehua bobijo jama ba'a: —¡Beca bobi a'a ijji ajji Jesusaja epeejji nei epojji! — acani Jodio etii cuaa.

Ma esohui shajja'ajja cani cuaa eshajja'ajjajeajji, de. Bobijo pojjeama Jesusaja epeejji nei poaje; ojaya esohui ba neinei majje.

¹⁰ Ecuea epeejji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajjija daqui equijo chacochoaninajeya aquiana ehuone' dahua majje ijji ca poa. Jamatii Eyacuiñajjija esohui eyacua ba mee jjima poa. Eyacuiñajjija esohui eyacua bobi jayojja. Ojaya

epeeji poanijo, ohuaya eseya oja esohui jayojja jama po mee cani, ma esohui bobi e'ijjiajji jayojja ba meesahua cani.

¹¹ Yahuajo nei Eyacuiñajji nijje emimijji etiiya aquiana na' dojobobiaqui caninaje Eyacuiñajjija equi yasijje, equecuayijji biso nei yasijje. Ojjaña shequiajajo oe dojobobiaquime acaninaje ijjiaca-jji ehuone na'. Dojobobiaqui majje jeasijjea caninaje Eyacuiñajjija ebajji. Jeasijjea caninaje Eyacuiñajjija etiiquianaja mimishi ecuijea'yojji sosejje. Ma aquiana etiiquianaja ijji jjima poa. Chojja. Dojocuayaqui caninaje cuiñajji esecue yasijje edahuajea'yojji.

¹² Oya jayojja Jesosa mano'yajo ojaya ena' cuayaquia poa esejaya mimishi cuijea'yojji sosejje, mimishi'ama nei nei epo mee'yojji. Dejja mimishi cuaa oya dojocuayaqui ca poa cuiñajji esecue yasijje equecua'yojji.

¹³ E'e, dejja mimishi cuaa oya quea tai aca poa. Jamatii Jesosa jjashahuabaqui jjima jama ba'a: — Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: — Eya manoje'yo acui ecueata'apeejo mimishi sosequia'yojji —Jesosa poanaje.

Jamajjeya Jesosa jayojja jama epo tiitijji. Jesosa nijje jjapeequianijo, mimishi cuaa eseya quea tai acajje jamatii Jesosa nijje ejjapee tiitiqui.

¹⁴ Eseyaya eba jiquio meshijo eba'e tiitijji pojjeama. Meshi esejaya eba'e tiijji yajji pojjeama. Quijje ca ca eseya ba'e tiitije'yo eba'ejji eyacuajo Jesosa nijje. Ma eba'ejji eyacuajo eseya jjashahuabaquiani.

15 Jamajjeya Jesusaja epeeji poanijo ¡Eyacuiñajji ejjabihuaia tiitiiqui! Jama ba'a: —Eyacuiñajji, miya quea pame nee nee. Pea chama' mi jayojja —ejja'a tiitiiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihuaña jama ba'a: —Jesosa, miya ecuanaja Emeshi Mese nei quea pame nee — oya bihuaña.

16 ¡Pea cuana quea pame nee atiitiicue pea'ai! ¡Nishehui'ama pocue, dejja tai'ama pocue! ¡A'a pajea'yojji! Jamaya poanijo Eyacuiñajji quea bihui nee poaje miquiana nijje.

17 ¡Jesusaja epeeji jaahuanajji cuanaja esohui jayojja jama acue! ¡Shajja'ajjacue, miquianaaya! Quijje Eyacuiñajji cojja nei nequiya emeshi meseya, mi jaahuanajjiya huohui caje achajja miquianaya jaahuana canaje. Jamajjeya miquianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjajje ohuaya miya quea bihui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

18 Epeeji cuana, ¡Eyacuiñajji nijje mimicue ecuanajo! Eyacuiñajji eba ecuanaya quea ja'a nee ba'e sa poani tii tii ojo. Ecuanaaya jjabaquiani quea ja'a nee ba'yani ojaya esohui jama.

19 Jamajjeya ¡ecuanajo mimicue Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecuanaya baa! ¡Jjeya nei oe poe meesahuacue! —acue!

Esohui quijjeyeje nei tehue'yo

20 Ecuea epeeji cuana, esejaya Emeshi Mese nei Jesosa oja epeeji cuana jaahuanajji poani, ñajjajja jaahuanajji nei nei jayojja oya poani. Mano'yajo, Eyacuiñajjiya Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Ejja miquijanajo mano'yonajejo, ojaya ena' cuayaquinajejo, ijjeya ecuea esohui eyacua jayojja jama atiitiicue! Jamajjeya miquijanaya ba'e tiitii meeje'yo enijje eyajo —Eyacuiñajji poanaje.

21 Miquianajo eya Eyacuiñajji nijje mimiani jama ba'a: —Eyacuiñajji, ¡miquea epeeji cuana ejjaba'echejjequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miquea ejjashahuabaquijji jayojja jama ameesahuacue pea'ai! Miquea Ebacua Ejja Jesosa Quito nijje jjapeequianijo, ¡jamaya ameesahuacue Jesosa quea bihui nee epojji! ¡Oya quea ca'a nee nee quea pame nee caba'e tiitii'yahua! Jamaya Eyacuiñajji —eya poani.

22 Ecuea epeeji cuana, eyaya jiquio esohui tehueaña miquijana quea bihui pojji. Eyaya oe pojji esohui tehueaña. Jamajjeya ¡ecuea esohui shajja'ajja neineicue quea bihui nee!

23 Esejaya epeeji Timoteo ejeanobia jaa poa. Cuayaqui mee ca'yonaje. Quijje pishana oya e que poe'yo majje enijje poquije miquijana baa.

24 Jamajjeya epeeji cuana, miquijanajaya esohui huohuijji cuana ojjaña Eyacuiñajjiya epeeji cuana miquijana nijje ba'e pea'ai ¡ecuanaja esohui huohuicue jama ba'a: —¿Achajja acuae nequiana ani so'o? —acue ecuanaja ebajji!

Ojjaña Eyacuiñajjiya epeeji cuana Itania meshi-
jje poe miqianajo jjashahuabaquiani: —¿Achajja
ami ani so'o? —huohui'ajjame acani ojaya ebajji.

²⁵ ¡Eyacuiñajjiya, esejaya Chii aiya miqianaya
cajaahuana cahua quea pame nee!

Mahuiso ecuea esohui. Eyaya Pabo bajjaniya
esohui tehuejeyonaje. Apoa.

Eyacuiñajjija Esohui
New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files
dated 29 Jan 2022

88838088-e20d-51ca-8c91-69194f5ae678